

摛藻堂四庫全書薈要

集部

欽定四庫全書

施註蘇詩卷三十九

集部

施註蘇詩卷三十九

宋蘇軾撰

宋施元之註

武進邵長衡刪補

詩五十一首

起建中靖國辛巳改元度嶺北歸卽以是年七月卒於毗陵

施註缺今

補

昔在九江與蘇伯固唱和其略曰我夢扁舟浮  
震澤雪浪橫江空一作千頃白覺來滿眼是廬山

倚天無數開青壁蓋實夢也昨日又夢伯固手持乳香嬰兒示予覺而思之蓋南華賜物也豈復與伯固相見於此耶今得來書知已在南華相待數日矣感歎不已故先寄此詩

扁舟震澤定何時滿眼廬山覺又非春草池塘惠連夢上林鴻鴈子卿歸水香知是曹溪口眼淨同看古佛衣不向南華結香火此生何處是真依

漢書蘇武傳昭帝卽位求武等匈奴言武死後使至常惠教漢使謂單于言天子射上林中得鴈足有係帛書

言武等在某澤中單于視左右大驚乃使武歸曹溪志  
梁時有天竺國僧自西來汎舶曹溪口聞異香曰上流  
必有勝地尋之遂開山立石乃云百七十年後當遇無  
上法師在此演法今六祖南華寺是也眼淨字屢見傳  
燈錄五祖黃梅弘忍大師以衣鉢潛付六祖今衣猶傳  
寺中古佛衣卽指此白樂天詩本結菩提香火社爲嫌  
煩惱電泡身

次韻韶守狄大夫見贈二首

華髮蕭蕭老遂良

公自注褚河南帖云卽日遂良贊髮盡白蓋謫長沙時也

一身萍

桂海中央無錢種菜爲家業有病安心是藥方才疎正  
類孔文舉癡絕還同顧長康萬里歸來空泣血七年供

奉殿西廊

公自注通英閣在延和殿西廊下

後漢書孔融傳字文舉融

負其高氣

志在靖難而才疎意廣迄無成功

森森畫戟擁朱輪坐詠梁公覺有神白傅閒游空誦句

公自注事見白樂

天吳郡詩石記拾遺窮老敢論親

公自注事見子美寄狄明府詩東

海莫懷疏受意西風幸免庾公塵爲公過嶺傳新唱催

發寒梅一信春

唐書狄仁傑封梁公此借用指韶州白樂天吳郡詩石記云韋在此州歌詩甚多有郡宴詩云兵衛森畫戟燕寢凝清香最爲警策今刻此篇於石傳貽將來因以予句宴一章亦附於後杜子美狄明府詩梁公曾孫我姊

弟不見十年官濟濟

次韻韶倅李通直二首

一篇瀧吏可書紳莫向長沮更問津老去常憂伴新鬼  
歸來且喜是陳人曾陪令尹蒼鬚古又見郎君白髮新  
回首天涯一惆悵卻登梅嶺望楓宸

韓退之瀧吏詩有云往間瀧頭吏潮州尚幾里瀧吏垂  
首笑官何問之愚族大瓶甕小所任自有宜官何不自  
量滿溢以取斯不知官在朝有益國家不得無虱其閒  
不武亦不文仁義飾其躬乃姦敗羣倫叩頭謝吏言始  
慙今更羞云云大指皆嘲憤之詞也左傳文二年夏父  
弗忌為宗伯尊僖公且明見曰吾見新鬼大故鬼小小嶺

南錄梅嶺即大庾嶺上  
多梅樹或云梅福隱處

青山祇在古城隅萬里歸來卜築初會見四山朝鶴駕  
更看二李跨鯨魚欲從抱朴傳家學應怪中郎得異書  
待我丹成馭風去借君瓊珮與霞裾公自注僕昔爲開  
封幕先公爲赤令  
暇日相與論内外丹且出其丹示僕今三十年而見君  
曲江同遊南華宿山水間數日道舊感歎且勸我卜居  
於舒故詩中皆及之

按先生與李惟熙帖云偶得生還平生愛龍舒風土欲  
卜居為終老之計云云是青山當指舒州但四山未詳  
其名耳一統志龍眠山在桐城縣又舒州有潛山左慈  
修煉處皖山天柱山道書稱司玄洞天漢武帝嘗登封

於此以代南岳或即指此數山也詩國風珮  
玉瓊琚韓退之詩亡君飛霞珮與我高韻頌

狄韶州煮蔓菁蘆菔羹

我昔在田間寒庖有珍烹常支折腳鼎自煮花蔓菁中  
年失此味想像如隔生誰知南岳老解作東坡羹中有  
蘆菔根尚含曉露清勿語貴公子從渠嗜羶腥

周易鼎折足覆公餗劉禹錫嘉話諸葛亮所止令兵士  
獨種蔓菁取其纔出甲可生啖一也葉舒可煮食二也  
久居則隨以滋長三也棄不令惜四也回即易尋而採  
五也冬有根可食六也今蜀人呼為諸葛菜唐本草菜  
菔即蘆菔也陶弘景別錄蘆菔根可食葉不中啖陸佃  
埤雅菜菔能制麵毒是菜年之所服故名按蔓菁蘆菔

諸家皆作二物惟陸機草虫魚疏葉是蔓菁根是蘆菔則一物矣先生似亦從陸說東坡羹頃見先生文集中又有玉糁羹

詩見補遺卷

李伯時畫其弟亮功舊隱宅圖

樂天蚤退今安有摩詰長閒古亦無五畝自栽池上竹十年空看輞川圖近聞陶令開三徑應許揚雄寄一區晚歲與君同活計如雲鵝鴨散平湖

白樂天池上篇十畝之宅五畝之園有水一池有竹千竿唐書王維字摩詰別墅在輞川有華子岡竹里館茱萸汎辛夷塢陶淵明歸去來辭三徑就荒漢書揚雄傳處岷山之陽曰郫有田一廛有宅一區杜子美詩房相

西池鵝一羣眠  
沙泛浦白於雲

贈龍光長老

舊傳先生詩本題云東坡居士過龍光求大竹作肩輿得兩竿南華

珪首座方受請為此山長老乃畱一偈院中須其至授之以為他時語錄中第一問

所得龍光竹兩竿持歸嶺北萬人看竹中一滴曹溪水

漲起西江十八灘

贈嶺上老人

鶴骨霜鬚心已灰青松合抱手親裁問翁大庾嶺頭住  
曾見南遷幾箇回

贈嶺上梅

梅花開盡百花開過盡行人君不來不趁青梅嘗煮酒  
要看細雨熟黃梅

盧仝詩鶯花爛熳君不來及至君來花已老  
杜子美詩南京犀浦道四月熟黃梅

予昔過嶺而南題詩龍泉鐘上今復過而北次

前韻

按卽前過大庾嶺詩

秋風卷黃落朝雨洗綠淨人貪歸路好節近中原正下  
嶺獨徐行艱峻未敢忘遙知叔孫子已致魯諸生

月令季冬之月草木黃落漢武帝秋風辭草木黃落兮  
鴈南飛漢書叔孫通為博士說上曰臣願徵魯諸生與  
臣弟子共起朝儀於是通使徵魯諸生三十餘人魯有  
兩生不肅行云云通笑曰若真鄙儒不知時變遂與所  
徵三十人西按陸游序云建中初韓曾二相得政盡收  
用元祐人其不召者亦補大藩惟東坡兄弟猶領宮祠

末句蓋寓所謂不能致者二人意深而語緩

## 過嶺二首

暫著南冠不到頭卻隨北鴈與歸休平生不作兔三窟  
今古何殊貉一丘當日無人送臨賀至今有廟祀潮州  
劍關西望七千里乘興真為玉局游

柳子厚六言詩一生判卻歸休為著南冠到頭唐書楊憑貶臨賀尉姻友憚往獨徐晦至藍田慰餞李夷簡表為監察御史曰君不負楊臨賀有負國乎韓退之謫潮州潮人為之立廟先生集中有廟碑

七年來往往我何堪又試曹溪一勺甘夢裏似曾遷海外醉中不覺到江南波生濯足鳴空澗霧繞征衣滴翠嵐誰遣山鷄忽驚起半嵒花雨落毵毵

按年譜公以紹聖元年自定州貶惠州凡四年再貶儋耳明年改元元符至三年乃量移廉州凡七年江南謂

荊州

雷題顯聖寺

渺渺疎林集晚鴉  
孤村煙火梵王家  
幽人自種千頭橘  
遠客來尋百結花  
浮石已乾霜後水  
焦坑間試雨前茶  
祇疑歸夢西南去  
翠竹江村遶白沙

首楞嚴經阿難白佛言世尊此寶疊華緝續成巾雖本一體如我思惟如來一綰得一結名若百結成終名百結又江南人謂丁香為百結

予初謫嶺南過田氏水閣東南一峰豐下銳上里人謂之鷄籠山予更名獨秀峰今復過之戲留一絕

倚天巉絕玉浮屠月與彭郎作小姑獨秀江南知有意

要三二別四三壺

韓退之詩倚天更覺青巉巉李太白詩青冥皖公山巉  
絕可人意同安志小孤山在宿松縣東南一百二十里  
又江州有澎浪磯語轉為彭郎磯遂有小姑嫁彭郎之  
語互見十五卷李思訓長江絕島圖詩注一統志大別  
山在漢陽府城北小別山在漢川王子年拾遺記海中  
三壺一曰方壺則方丈也二曰蓬壺則蓬萊也三曰瀛  
壺則瀛洲也此三山上廣中狹下方皆如工製猶華山  
之似削咸列于渤海之東有大壑焉其中有山一曰岱  
輿二曰圓嶠三曰方壺云

乞數珠贈南禪湜老

從君覓數珠老境仗消遣未能轉千佛且從千佛轉儒  
生推變化乾策數大行道士守玄牝龍虎看舒卷我老  
安能為萬劫付一喘嘿坐閱塵界往來八十反一作返  
區我所寄蹙縮蟻在繭適從海上回蓬萊又清淺

傳燈錄法達禪師誦法華經及三千部六祖謂之曰心  
迷法華轉心悟轉法華周易大衍之數五十其用四十  
有九又曰凡天地之數五十有五此所以成變化而行  
鬼神也金晶論夫龍虎金木也金為虎木為龍虎之異  
名真鉛金水也龍之異名真汞木火也楞嚴經心  
能記憶八萬四千洹河沙劫周徧了知得無疑惑

鬱孤臺

公自注再過

虔州和前韻

吾生如寄耳嶺外亦閒游贛石三百里寒江尺五流楚山微有霰越瘴久無秋望斷橫雲崎魂飛咤雪洲曉鐘時出寺暮鼓各鳴樓歸路迷千嶂勞生閱百州不隨猿鶴化甘作賈胡畱紙有貂裘在猶堪買釣舟

孟浩然詩贛石三百里沿江千嶂間李肇國史補蜀之三峽南康之贛石皆險絕之所爾雅山狹而長曰嶠王注橫雲嶠指五嶺咤雪洲謂瓊崖儋萬四州南越地炎瘴而無雪有雪則以為咤抱朴子周穆王南征久而不歸一軍皆化君子為猿為鶴小人為虫為沙賈胡畱後漢馬援事注已見

虔守霍大夫監郡許朝奉見和復次前韻

大邦安靜治小院得閒遊贛水雨已漲廉泉春未流同  
烹貢茗雪一洗瘴茅秋秋思生尊鱠寒衣待橘洲揚雄  
未有宅王粲且登樓老景無多日歸心夢幾州敢因逃  
酒去端為和詩畱舊篋藏新語清風自滿舟

贈虔州術士謝晉臣

屬國新從海外歸君平且莫下簾帷前生恐是盧行者  
後學過呼韓退之死後人傳戒定慧生時宿直斗牛箕  
憑君為算行年看便數生時到死時

領聯已見三十六卷答周循州詩惟自字今作恐字韓退之詩我生之辰月宿南斗牛奮其角箕張其口樊注蘇內翰云吾生平遭口語無數蓋生時與退之相似吾命宮在斗牛間而身宮亦在箕

虔州景德寺榮師湛然堂

卓然精明念不起兀然灰槁照不滅方定之時慧在定定慧照寂非兩法妙湛總持不動尊默然真入不二門語息則默非對語此話要將周易論諸方人人把雷電不容細看真頭面欲知妙湛與總持更問江東三語掾楞嚴經攝心為戒因戒生定因定發慧是則名為三無漏學又淨極光通達寂照含虛空又妙湛總持不動尊

首擣嚴王世希有周易復卦注凡動息則靜  
靜非對動者也語息則默默非對語者也

次陽行先

公自注用  
鬱孤臺韻

室空惟法喜心定有天游摩訶元無病須洹不入流苦  
嫌尋直枉坐待寸田秋雖未麒麟閣已逃鸚鵡洲酒醒  
風動竹夢斷月窺樓衆謂元德秀自稱陽道州拔葵終  
相魯辟穀會封畱用舍俱無礙飄然不繫舟

金剛經須陀洹名為入流而實無所入漢書蘇武傳甘  
露三年單于入朝帝思股肱之良乃圖畫其人於麒麟

閣輿地志鸚鵡洲在武昌  
府城南即黃祖殺禰衡處

再用數珠韻贈湜長老

嗣宗雖不言叔寶猶理遣東坡但熟睡一夕一展轉南遷昔虞翻郤掃今馮衍古佛旣手提諸方皆席卷當年清隱老鶴瘦龜不喘和我彈丸詩百發亦百反者年日彫喪但有犢角齒時來窺方丈共笑虎毛淺

傳燈錄手提諸佛直見本來面目諸方尊宿無能出其右又百丈禪師侍馬祖言下省悟次日馬祖陞座衆纔集百丈出卷郤席祖便下座白樂天贈王山人詩夜後不聞龜喘息秋來惟長鶴精神禮記天地之牛角齒栗爾雅釋獸篇虎切毛謂之號注切淺也疏淺毛者別名號貓號音潺又鉏限助諫二切

和猶子遲贈孫志舉

軒裳大爐講陶冶一世人從橫落模範誰復甘飢貧可憐方回癡初不疑嘉賓頗念懷祖黠瞋兒與兵姻失身墮浩渺投老無涯垠回看十年舊誰似數子真孫郎表獨立霜戟交重闈深居不汝覲豈問親與鄰連枝皆秀傑英氣推伯仁我從海外歸喜及崆峒春新年得異書西郭有逸民公自注陽行先以登真隱訣見借小孫又過我歡若平生親清詩五百言句句皆絕倫養火雖未伏要是丹砂銀

我家六男子朴學非時新詩詞各璀璨老語徒周諱願  
言敦宿好永與竹林均六子豈可忘從我屢厄陳

莊子大宗師今一以天地為大鑪以造化為大冶揚子  
師者令模範也以木曰模以竹曰範晉書郗愔傳字方  
回超字嘉賓超實黨桓氏以愔忠於王室不令知之將  
亡出一箱付門生曰我亡後公若大損眠食可呈此箱  
及超死愔果哀悼成疾門生依旨呈之悉與溫往反密  
計愔於是大怒曰小子死恨晚矣又王述傳字懷祖子  
坦之為桓溫長史溫欲為子求婚於坦之及還家省父  
而述愛坦之雖長大猶抱置膝上坦之因言溫意述大  
怒遽排下曰汝竟癡耶詎可畏溫面而以女妻兵也晉  
書周俊傳三子顓嵩謨顓別有傳伯仁顓字登真隱訣  
梁貞白先生所述抱朴子丹砂燒之成水銀積變又還  
成丹砂故能令人長生大洞鍊真寶經將丹砂修煉伏

火後鼓成白銀名之為一返也 將白銀化出砂令伏火  
鼓之乃成黃銀名之為二返也 六男子謂邁迨過遲迨  
遠左傳襄三十一年穆叔曰趙孟年未盈五  
十而諄諄焉如八九十者陶詩詩書敦宿好

南禪長老和詩不已故作六蟲篇答之

鳳皇覽德輝遠引不待遣鷁鷀戀庭宇倏忽來千轉那  
將坐井蛙而比談天衍蠹魚著文字槁死猶遭卷老牛  
疲耕作見月亦妄喘東坡方三問南禪已五反老人但  
目擊侍者應足繭最後六蟲篇深寄恨語淺

賈誼弔屈原賦鳳皇翔於千仞兮覽德輝而下之莊子  
山木篇鳥莫知於鷁鷀注鷁鷀燕也韓退之詩何殊蠹

書虫生死文字間風俗通吳牛望月而先喘又滿奮語  
載世說已見淮南子楚王欲攻宋墨子聞之自魯而趨  
十日十夜足重繭而不休息至於郢  
見楚王杜子美詩足繭荒山轉愁寂

明日南禪和詩不到故重賦數珠篇以督之二

首

未來不可招已過那容遣中間見在心一一風輪轉自  
從一生二巧歷莫能行不如袖手坐六用都懷卷風雷  
生磬歎萬竅自號喘詩人思無邪孟子內自反大珠分  
一月細綆合兩繭纍然挂禪牀妙用夫豈淺

金剛經過去心不可得見在心不可得未來心不可得  
楞嚴經覺明空昧相待成搖故有風輪執持世界莊子  
齊物論一與言為二二與一為三自此以  
往巧歷不能得而况其凡乎六用注已見

朝來取飯化乃是維摩遣全鋒雖未露半藏已曾轉說  
有陋裴顧談無笑王衍看經聊爾耳遮眼初不卷三咤  
故自醒一咤何由喘請歸視故攢靜夜珠當反安居三  
十年古衲磨山繭持珠尚嘿坐豈是功用淺

傳燈錄羅山示衆云全鋒敵勝罕遇知音同死同生萬  
中無二又僧問大茅和尚如何是大茅境界師云不露  
鋒僧云何為不露鋒師云無當者又有媿令人詣趙  
州求轉藏經趙州卻下禪牀轉一帯乃曰轉藏經已竟

其人回舉似媼媼曰比來請轉全藏如何祇為轉半藏  
晉書裴頠傳頠深患王衍之徒聲譽太盛位高勢重不  
以物務自嬰遂相倣倣風教陵遲乃著崇有論以釋其  
蔽晉書王衍傳魏正始中何晏王弼等祖述老莊立論  
以為天地萬物皆以無為為本無也者開物成務無往  
不存者也衍甚重之惟裴頠以為非著論以譏之而衍  
處之自若傳燈錄藥山看經曰且圖遮眼再見尚書顧  
命三宿三祭三咤注云至齒而不飲曰咤韓非子楚人  
有責其珠於鄭者為木蘭之櫃薰桂椒之櫃綴以珠玉  
鄭人買匱而還其珠此可謂善賣匱矣未可謂善鬻珠  
也

用前韻再和霍大夫

前和陽行先韻

文字先生飲

公自注謂劉執中

江山清獻遊典刑傳父老尊俎

繼風流度嶺逢梅雨還家指麥秋自慙鴻鴈侷爭集稻  
梁洲野闊橫雙練城堅聳百樓行看鳳尾詔郤下虎頭

州君意已吳越我行無去畱歸途應食粥乞米使君舟

王注清獻趙閔道也劉趙二公皆知虔州廣絕交論分

鴈鷺之稻梁庾信詠鴈詩稻梁俱可戀飛去復飛還王

注雙練謂章貢二水後漢公孫瓊傳云兵法百樓不攻

紀聞譚晉元帝踐祚凡諸侯牋奏批之曰諾而草書若

字之尾如鳳形故謂之鳳尾詔松陵集皮陸

詩君批鳳尾詔戒住虎頭巖虎頭謂虔州也

用前韻再和許朝奉

高門元世舊客路晚追遊清絕聞詩語疏通豈法流傳

家有衣鉢斷獄盡春秋邂逅陪車馬尋芳謝朓洲淒涼  
望鄉國得句仲宣樓恨賦投湘水悲歌祀柳州何如五  
字律相與一尊畱更約登塵外歸時月滿舟

漢藝文志法家者法蓋出於理官斷獄如雋不疑引春  
秋蒯牘斷戾太子事見漢書本傳謝朓詩芳洲採杜若  
白氏金針梁元帝詩云朝出屠羊縣夕返仲宣樓凡詩  
四句以第一句對三句以第二句對四句謂之扇對又  
梅聖俞續金針引前人詩云昔時花下畱連飲暖日天  
桃鶯亂啼今日江邊容易別淡煙衰草馬頻嘶以證其  
格今此兩聯卽其格也廬外亭名在虔州公有詩見三  
十五卷傳燈錄慧禪師偈曰夜靜水寒魚不食滿船空

載月明歸

用前韻再和孫志舉

人衆者勝天天定亦勝人鄧通豈不富郭解安得貧驚  
飛賀廈燕走散入幕賓醉眠中山酒結夢南柯姻寵辱  
能幾何悲歡浩無垠回視人間世了無一事真灑掃古  
玉局香火通帝闈我室思無邪我堂德有鄰所至為鄉  
里事賢友其仁之子富經術蔚如井大春蜿蜒楚南極  
淑氣生此民唱高和自寡非我誰當親譬彼嶰谷竹翦  
裁待伶倫俗學吁可鄙紙繒配芻銀聊將調癡鬼亦復

爭華新願子事篤實浮言掃謠諱窮通付造物得喪理  
本均期子如太倉會當發陳陳

漢書倭辛傳文帝使善相人者相鄧通曰當貧餓死上  
曰能富通者在我何說貧於是賜通蜀嚴道銅山得自  
鑄錢鄧氏錢布天下漢書游俠傳武帝徙豪右茂陵郭  
解貧不中徙吏恐不敢不徙衛將軍為言郭解家貧不  
中徙上曰郭解布衣權至使將軍此其家不貧淮南子  
湯沐具而蟻虱相弔大廈成而燕雀來賀互見前思無  
邪先生齊名韓退之詩我來亦已幸事賢友其仁東漢  
井丹字大春深於經術再見韓送廖道士序彬之為州  
又當中州清淑之氣婉贊扶輿磅礴而鬱積意必有魁  
奇忠信材德之民生王注紙繒芻銀喻俗學之無

實譜音占字出素  
問病而狂言也

崔文學甲攜文見過蕭然有出塵之姿問之則  
孫介夫之甥也故復用前韻賦一篇示志舉

象服盛簪珥豈是邢夫人敝衣破冠履可憐范叔貧君  
看崔員外晚就觀國賓當年頗赫赫翁嫗爭為姻公自見

退之贈崔員外詩 蹤蹬阻風水橫斜挂邊垠青衫映白髮今似

梅子真道存百無害甘守吳市闥自言總角歲慈母為  
擇鄰邦人驚似舅矯矯惡不仁詩文非他師家法乃富  
春豈非空同秀為國產雋民挺然齊魯生近出姬姜親

為文不在多一頌了伯倫清詩要鍛一作淘 煉乃得鉛中

銀自找還嶺外七見槐火新著書已絕筆一嘿含千諱

貢梓和葦籥天節非人均時時自娛嬉豈為俗子陳

邢夫人事見第十四卷芙蓉城詩注杜子美詩甫昔少

年日早充觀國賓韓退之寄崔立之詩老婦願嫁女約

不論財貲老翁不量分累月笞其兒晉書何無忌傳桓

玄聞義軍起大懼曰劉裕勇冠三軍當今無敵劉毅家

無儋石之儲擣蒲一擣百萬何無忌劉牢之之甥酷似

其舅共舉大事何謂無成晉書劉伶傳字伯倫未嘗厝

意文翰惟著酒德頌一篇管子上有鉛下有銀蘇頌本

草圖經銀在鋤中與銅相雜土人采得以鉛再三煎鍊

方成又鉛銀最難得今時燒煉家每一斤鉛止得一二

銖周禮司爟掌行火之政令四時變國火注春取榆柳

夏取棗杏夏季取桑柘秋取柞楠冬取槐檀也杜子美詩九鑽巴喫火先生用其意蓋紀年也禮記蕡桴土鼓葷籥伊者氏之樂也

### 畫車二首

何人畫此隻一作𦨇輪車便是當年欹器圖上易下難須審細左提右挈免疎虞

公羊傳晉人敗秦師於殽匹馬隻輪無反者家語孔子觀於魯桓公之廟有欹器焉問守廟者此何器對曰此蓋宥坐之器孔子曰吾聞宥坐之器虛則欹中則正滿則覆明君以為至誠漢書張耳傳廩養卒說燕曰夫以一趙尚易燕况以兩賢王左提右挈而責殺王滅燕易矣

九衢歌舞頌王明誰惻寒泉獨自清賴有千車能散福  
化為膏雨滿重城

虔州呂倚承事年八十三讀書作詩不已好收  
古今帖貧甚至食不足

潘子真詩話補遺呂倚夢得維揚人少有場屋

聲善屬對喜收書畫蹭蹬不偶老始以恩補

虔州瑞金尋致仕貧無以歸年八十餘惟有

一女嫁贛人因居焉與王禹玉有舊元豐間

餉錢二萬酒十壺夢得作啟致謝隔句中用

白水真人青州從事為對禹王極嘆

賞之其後東坡過虔以詩遺之云

楊雄老無子馮衍終不遇不識孔方兄但有靈照文家

藏古今帖墨色照箱宮飢來據空案一字不堪煮枯腸  
五千卷磊落相攢柱吟為蜩蛩聲時有鳥可句為語里  
長者德齒敬已古如翁有幾人薄少可時助

韓退之贈盧仝詩俸錢供給  
公私餘時致薄少助祭祀

王子直去歲送子由北歸往返百舍今又相逢

贊上戲用舊韻作詩畱別先生有贈王子直秀才詩見三十五卷

米盡無人典破裘送行萬里一鄒游解舟又欲攜君去  
歸舍聊須與婦謀聞道年來丹伏火不愁老去雪蒙頭

# 乘買山田添鶴口廟堂新拜富民侯

顏魯公與蔡明遠帖云聞鄒游與明遠同來欲至采石計其不久亦合及吾於淮泗之間魏野間居詩成家書

滿室添口

鶴生孫

## 次韻江晦叔二首

人老家何在龍眠雨未驚酒船回太白驛子候淵明幸與登仙郭同依坐嘯成小樓看月上劇飲到參橫鐘鼓江南岸歸來夢自驚浮雲世事改孤月此心明雨已傾盆落詩仍翻水成二江爭送客木杪看橋橫

次韻江晦叔兼呈器之

劉安世字器之終於寶文閣待制學者號曰元

城先

生

橫空初不跨鵬鷁但覺胡牀步步高

公自注器之言嘗夢飛自覺身與坐

牀皆起

一枕畫眠春有夢扁舟夜渡海無濤歸來又見

顛茶陸

公自注往在錢塘嘗語晦叔陸羽茶顛君亦然

多病仍逢止酒陶

公自注陶

淵明有止酒詩器之小時飲量無敵今不復飲矣

笑說南荒底處所祇今榕葉

下庭臯

王注先生渡江北還以三更發瓊州晚到遞角場元城先生語錄某初到南方有一高僧教某南方地熱而酒

性亦熱今嶺南煙瘴之地更加以酒必大發疾故某過  
嶺卽合家斷酒雖徧歷水土惡弱他人必死之地某合  
家十口皆無恙今北歸已十年矣無一患瘴者此其效也

### 寒食與器之游南塔寺寂照堂

城南鐘鼓闢清新端為投荒洗瘴塵總是鏡空堂上客  
誰為寂照境中人紅英掃地風驚曉綠葉成陰雨洗春  
記取明年作寒食杏花曾與此翁鄰

先生和聰上人詩一悟鏡空老始知圓澤賢楞嚴經湛  
然寂照韓退之杏花詩居都北郭古寺空杏花兩株能

白紅明年更發應更好道人莫忘鄰家翁

器之好譚禪不喜游山山中筭出戲語器之可

同參玉版長老

冷齋夜話先生邀器之食筭味勝問此何名東坡曰卽玉版也

此老師善說法器之乃悟其為戲坡公大笑作偈云云

叢林真百丈法嗣有橫枝

公自注玉版橫枝竹筭也

不怕石頭路來

參玉版師聊憑柏樹子與問驛龍兒瓦礫猶能說此君

那不知

釋氏要覽梵語貧波此云叢林傳燈錄洪州百丈山懷海禪師所居處巖巒峻極故號曰百丈又黃梅謂道信師曰和尚他後橫出一枝佛法禪家旁出者謂之橫枝前燕錄石季龍使人采藥上華山得玉版先生詩則借

以喻筭也莊子道在瓦礫傳燈錄有僧問如何是佛文  
殊答云牆壁瓦礫而猶能說之此君竹也用王子猷語  
屢見

永和清都觀道士童顏鬒髮問其年生於丙子  
蓋與予同求此詩

鏡湖勅賜老江東未似西歸玉局翁羈枕未容春夢斷  
清都宛在默存中每逢佳境攜兒去試問行年與我同  
自笑餘生消底物半篙清漲百灘空公自注予與劉器  
忽清漲丈餘贛石二百里無一見者至永  
和器之解舟先去予獨遊清都作此詩

贈詩僧道通

雄豪而妙苦而腴祇有琴聰與蜜殊

公自注錢塘僧思聰總角善琴後捨

琴而學詩復弃詩而學道其詩似皎然而加雄放安州僧仲殊詩敏捷立成而工妙絕人殊辟穀常啖蜜語

帶烟霞從古少

公自注李太白云他入之文如山無烟霞春無草木

氣含蔬筍到

公無

公自注謂無酸餡氣也

香林乍喜聞薈蕎古井惟慙斷轆轤

為報韓公莫輕許從今島可是詩奴

劉禹錫答柳子厚書新文吟而繹之顧其詞甚約而味翕然以長端而憂苦而腴

張競辰永康所居萬卷堂

王注張熙明也

君家四壁如相如  
卷藏天祿吞石渠  
豈惟鄴侯三萬軸  
家有世南行祕書  
兒童拍手笑何事  
笑人空腹談經義  
未許中郎得異書  
且與揚雄說奇字  
清江繁出碧玉環  
下有老龍千古閒  
知君好事家有酒  
化為老人夜扣關  
雷侯之孫書滿腹  
玉函寶方何用讀  
濠梁空復五車多  
地上從來一編一作足

篇

國朝雜事唐太宗出幸有司請載書以  
從帝曰不須虞世南在此行祕書也

劉壯輿長官是是堂

閒燕言仁義是非安可無非非義之屬是是仁之徒非  
非近乎訛是是近乎諛當為感麟翁善惡分錙銖抑為  
阮嗣宗臧否兩含糊劉君有家學三世道益孤陳古以  
刺今紬史行天誅皎皎大明鏡百陋逢一殊鶻立時四  
顧何由擾羣狐作堂名是是自說行坦途孜孜稱善人  
不善自遠徂願君置座右此語禹所謨

漢書士相與言仁義於閒燕歐陽永叔非非堂記是是  
近乎詔非非近乎訛不幸而過寧訛無詔先生用其說  
按麟翁二句指仲尼作春秋韓退之詩近來自說尊坦  
途左傳宣十六年羊舌職曰吾聞之禹稱善人不善人

遠後漢崔瑗  
有座右銘

予昔作壺中九華詩其後八年復過湖口則石  
已為好事者取去乃和前韻以自解云

江邊陣馬走千峰問訊方知冀北空尤物已隨清夢斷

公自注劉夢得以九華為造物一尤物

真形猶在畫圖中

公自注道藏有五岳真形圖

歸來晚歲同元亮卻掃何人伴敬通賴有銅盆修石供

仇池玉色自璁瓈

公自注家有銅盆貯仇池石正綠色有洞水達背于又嘗以怪石供佛印

師作怪石  
供一篇

次韻郭功甫二首

功甫觀先生畫雪雀有感作詩寄惠州云平生才力信瑰

奇今在窮荒豈易歸正似雪林枝上畫羽翰

雖好不能飛後先生北歸又用前韻寄詩云

秋霜春雨不同時萬里今從海外歸已出網羅毛羽在卻尋雲跡帖天飛今次其韻也

蚤知臭腐卽神奇海天南總是歸九萬里風安稅駕

雲鵬今悔不卑飛

可憐倦鳥不知時空羨騎鯨得所歸玉局西南天一角

萬人沙苑看孤飛

按年譜元符三年庚辰五月自儋移康州八月又移永州十一月被命復朝奉郎提舉成都玉局觀沙苑用徐

佐卿化鶴事詳見三

十七卷新居詩注

卷三十九

次韻法芝舉舊詩一首

春來何處不歸鴻非復羸牛踏舊蹤但願老師真似月  
誰家糞裏不相逢

王注建中靖國初盡起元祐諸公之廢先生亦得請歸  
常州故以歸鴻起興先生舊有詩與法芝云團團如磨

牛步步踏陳迹又云老芝如  
雲月炯炯時一出故今云爾

次舊韻贈清涼長老

過淮入洛地多塵舉扇西風欲污人但怪雲山不改色

豈知江月解分身  
安心有道年顏好一作遇物無情句

法新送我長蘆舟  
一葉笑看雪浪滿衣巾

傳燈錄僧問龍光和尚賓頭盧一身何為  
赴四天供師曰千江同一月萬戶盡逢春

睡起聞米元章冒熱到東園送麥門冬飲子

一枕清風直萬錢  
無人宵買北牕眠  
開心煖胃門冬飲

知是東坡手自煎

本草別錄麥門冬葉如蕷根似麥

而有鬚凌冬不凋故又名忍冬

夢中作寄朱行中

舊傳先生本序云前一日夢作此詩寄朱行中覺而記之

自不曉所謂謾寫去夢  
中分明用此色紙也

舜不作六器誰知貴璵璠哀哉楚狂士抱璞號空山相  
如起睨柱頭璧與俱還何如鄭子產有禮國自閑雖微  
韓宣子鄙夫亦辭環至今不貪寶凜然照塵寰

周禮宗伯以玉作六器以禮天地四方尚書舜典修五  
禮五玉注五等諸侯所執之玉也逸論語璵璠曾之寶  
玉也孔子曰美哉璵璠遠而望之煥若也近而視之瑟  
若也春秋陽虎竊寶玉大弓注寶玉卽璵璠左傳昭十  
六年晉韓宣子有環其一在鄭商宣子謁諸鄭伯子產  
弗與曰大國之求無禮以斥之何鑿之有韓子買諸賣  
人以告子產曰今吾子以好來辱而謂敝邑強奪商人  
母乃不可乎韓子辭玉曰起不敢求玉以徼二罪請

辭之

答徑山琳長老

徑山長老無畏大士維琳湖之武康人也至常州與東坡問疾

詩云扁舟駕蘭陵自援舊風日君家有天人雄雄維摩詰我口吞文殊千里來問疾若以

默相酬露柱皆笑出

與君皆丙子各已三萬日一日一千偈電往那容詰大患緣有身無身則無疾平生笑羅什神呪真浪出

晉書鳩摩羅什傳從師授經日誦千偈王注按年譜先生於景祐三年丙子卒於常州乃建中靖國元年卒已實二萬三千四百六十日今云三萬日舉成數耳老子吾有大患為吾有身若無吾身吾有何患又羅什傳

未終之日覺四大不愈乃日出三番神呪令外國弟子誦之以自救未及致力轉覺危殆於是力疾與衆僧告別此詩蓋先生示疾時而和琳老者也故用羅什將終時事



施註蘇詩卷三十九



總校官庶吉士臣張能照  
校對官編修臣楊壽楠  
謄錄監生臣喻泰階

欽定四庫全書叢要

集部

施註蘇詩卷四十二



詳校官助教臣常循

欽定四庫全書  
薈要卷一萬四千九百九十一

集部

施註蘇詩卷四十

宋蘇軾撰

宋施元之註

武進邵長蘅刪補

遺詩二十九首

施註缺  
今補

老翁井

井中老翁悞年華  
白沙翠石公之家  
公來無蹤去無迹  
井面圓圓水生花  
翁今與世兩何與  
無事紛紛驚牧豎

改顏易服與世同無使世人知有翁

予以事繫御史臺獄獄吏稍見侵自度不能堪  
死獄中不得一別子由故作二詩授獄卒梁成  
以遺子由

聖主如天萬物春小臣愚暗自亡身百年未滿先償債  
十口無歸更累人是處青山可埋骨他年夜雨獨傷神  
與君世世為兄弟又結來生未了因

柏臺霜氣夜淒淒風動琅璫月向低夢遙雲山心似鹿

魂飛湯火命如鷄眼中犀角真吾子身後牛衣愧老妻

百歲神遊定何處桐鄉知葬浙江西

公自注獄中聞杭湖間民為余作解

厄道場者累

月故有此句

漢書御史府中列柏樹常有野鳥數十棲宿其上因名烏臺又名柏臺杜子美詩風動金琅璫犀角字出國語牛衣用王章事桐鄉

用朱邑事並已見

十二月二十八日蒙恩賚授檢校水部員外郎

黃州團練副使復用前韻

百日歸期恰及春餘年樂事最關身出門便旋風吹面

走馬聯翩鵲噪人卻對酒盃渾是夢試拈詩筆已如神  
此災何必深追咎竊祿從來豈有因

左傳定三年闇曰夷射姑旋焉杜注旋小便也韓退之  
石鼎聯句序道士起出戶若將便旋然又詩起居諫議  
聯翩

來

平生文字為吾累此去聲名不厭低塞上縱歸他日馬  
城東不鬪少年雞休官彭澤貧無酒隱几維摩病有妻  
堪笑睢陽老從事為予投檄向江西

公自注子由聞予下獄乞以官爵贖

予罪貶筠州監酒淮南子近塞上之人其馬亡入胡中  
人皆弔之其父曰此何詎知不為福居數月其馬將胡

駿馬而歸人皆賀之其父曰此何詎不為禍曹子建詩  
鬪鷄東郊道唐東城父老傳明皇好鬪鷄時賈昌為五

兒百小長

劉顥宮苑退老於廬山石碑卷顥陝西人本進  
士換武家有聲伎詩缺

西山戲贈武昌王居士并引

予往在武昌九曲西山亭上有題一句玄鴻橫號  
黃槲峴九曲亭即吳王峴山一山皆槲葉其旁即  
元結波湖也荷花極盛因為對云皓鶴下浴紅荷

湖座客皆笑同請賦此詩

一統志樊山即西山也  
山有九曲嶺元結寒溪

在其下相傳有

吳王避暑宮

江干高居堅關局健躬躬稼角挂經蒿竿繫舸菰茭隔  
笳鼓過軍鷄狗驚解襟顧景各箕踞擊劍賡歌幾舉觥  
荆笄供膾愧攬睂乾鍋更戛甘瓜羹

漢兒寬傳帶經而鋤唐書李密傳以蒲蘢乘牛挂漢書  
一帙角上行且讀宋沈慶之詩歸來笳鼓競杜子美詩  
殺戮到鷄狗戛羹漢高祖事在漢書楚元王傳詳見十  
三卷哭刁景純詩注按經字係九青韻豈先生偶失檢  
耶

十二月二十日恭聞太皇太后升遐

慈聖  
后也

吏以

罪人不許成服欲哭則不敢欲泣則不可故作

挽詞二章

巍然開濟兩朝勲信矣才難十亂臣原廟故應祠百世  
先王何止活千人和熹未聖猶貪位明德雖賢不及民  
月落風悲天雨泣誰將椽筆寫光塵

杜子美蜀相詩兩朝開濟老臣心論語十亂注其一人  
蓋邑姜也後漢和熹鄧皇后紀和帝崩殤帝生始百日  
后乃迎立之尊后為太皇太后臨朝及殇帝崩太后定  
策立安帝猶臨朝政范曄論曰鄧后稱制終身號令自

出術謝前政之良身闢明辟之義至使嗣主側目歛衽于虛器直生懷懸書于象魏借之儀者殆其惑哉又明德馬皇后紀皇太后曰馬貴人德冠後宮即其人也遂立為皇后常衣大練裙不加緣建初元年欲封爵諸舅太后不聽晉書王恂傳夢人以大筆如椽與之既覺語人云此當有大手筆事俄而帝崩哀冊謚議皆恂所草老子和其光同其塵王注王立之云此詩蓋未嘗進其後作宣仁挽詞取其兩句云固應祠百世何止活千人

未報山陵國士知遼林松柏已猗猗一聲慟哭猶無所萬死酬恩更有時夢裏天衢隘雲仗人聞雨淚變形帷  
關雎卷耳平生事白首累臣正坐詩

史記刺客列傳豫讓曰知伯以國士遇我我以國士報之毛詩關雎卷耳皆后妃之詩左傳成三年對曰以君

之靈彙臣得歸骨于晉

戲足柳公權聯句

并引

宋玉對楚王此獨大王之雄風也庶人安得而共之譏楚王知已而不知人也柳公權小子與文宗聯句有美而無箴故為足成其篇

人皆苦炎熱我愛夏日長薰風自南來殿閣生微涼一  
為居所移苦樂永相忘願言均此施清陰分四方

戲作賈梁道詩

并引  
紹似康一題  
即此首

施註目有嵇

王凌謂賈充曰汝非賈梁道之子耶乃欲以國與人由是觀之梁道之忠于魏也久矣司馬景王既執凌歸過梁道廟凌大呼曰我亦大魏之忠臣也及司馬病見凌與梁道守而殺之二人者可謂忠義之至精貫于神明矣然梁道之靈獨不能已其子充之姦至使首發成濟之事此又理之不可曉者也故予戲作小詩云

嵇紹似康為有子郗超鑒似無孫如今更恨賈梁道  
不殺公閭殺子元

晉書嵇紹傳中散大夫康之子也王師敗績于蕩陰百  
官及侍衛莫不散潰惟紹儼然端冕以身捍衛兵交御  
輦飛箭雨集紹遂被害于帝側血濺御服天子深哀歎  
之及事定左右欲浣衣帝曰此嵇侍中血勿浣也又郗  
鑒傳與王敦相見鑒曰丈夫既絜身北面義全在三宣  
可渝生屈節覲天壤耶敦聞言大忿之及祖約蘓峻  
反鑒設壇場刑白馬大誓三軍三軍爭為用命圍解進  
位太尉尋薨冉曰惟公忠亮雅正行為世表社稷之危  
賴公以寧云云子情惰子超桓溫辟為征西大將軍掾  
又轉為參軍溫懷不軌欲立霸王之基超為之謀主以  
情忠于王室不令知之公閭

賈充字子元司馬景王字

戲孫公素

披扇當年笑溫嶠握刀晚歲戰劉郎不須戚戚如馮衍便與時時說李陽

世說溫嶠下玉鏡臺一枚聘姑女既婚交禮女以手披紗扇撫掌大笑曰我固疑是老奴果如所卜三國志法正傳孫權以妹妻先主妹才捷剛猛有諸兄之風侍婢百餘人皆親執刀侍立先主每入喪心常凜凜漢書馮衍傳妻北地任氏妬悍衍作書與其兄遂逐之世說王夷甫婦郭泰寧女才拙而性剛夷甫患之而不能禁時其鄉人幽州刺史李陽京都大俠郭氏憚之夷甫驟諫之乃曰非但我言卿不可李陽亦謂卿不可郭氏為之

趙成伯家有麗人僕忝鄉人不宵開樽徒吟春

雪美句次韻一笑

繡簾朱戶未曾開誰見梅花落鏡臺試問高吟三十韻

何如低唱兩三杯

公自注世言檢死秀才衣帶上有雪詩三十韻又云陶穀學士買得黨太

尉家妓遇雪陶收雪水烹團茶謂妓曰黨家應不識此妓曰彼廬人安得此但能於銷金緩帳中淺斟低唱喫

羊羔兒酒陶黑然慙其言

莫言衰鬢聊相映須得纖腰與共回知道

文君隔青瑣梁園賦客肯言才

公自注聊答來句義取婦人而已罪過罪過

丈君司馬相如妻見本傳世說韓壽美姿容賈充女於青瑣牕中看見壽說之謝惠連雪賦染王不悅遊於兔

園名鄒生延枚叟相  
如未至居客之右

送南屏謙師并序

南屏謙師妙於茶事自云得之於心應之於手非  
可以言傳學到者十二月二十七日聞軾遊壽星  
遠來設茶作此詩贈之

道人曉出南屏山來試點茶三昧手忽驚午盞兔毛斑  
打作春麌鵝兒酒天台乳花世不見玉川風腋今安有  
先生有意續茶經會使老謙名不朽

按第六卷先生月兔茶詩云中有迷離玉兔兒兔毛班  
疑即指此茶也杜子美詩鵝兒黃似酒天台記丹丘出  
大茗服之生羽翼茶寮記雲腳漸垂乳  
花浮面又茶有石乳滴乳白乳之號

### 虛飄飄三首

虛飄飄畫簷蛛結網銀漢鵠成橋塵漬雨桐葉霜飛風  
柳條露凝殘點見紅日星曳餘光橫碧霄虛飄飄比浮  
名利猶堅牢

淮南子烏鵲填河  
成橋而渡織女

虛飄飄花飛不到地虹起謾成橋入夢雲千疊游空絲

萬條垂柳百尺橫蒼海鴈字一行書絳霄虛飄飄比人  
身世猶堅牢

史記天官書海  
旁蜃氣象樓臺

虛飄飄風寒吹絮浪春水暖冰橋勢緩震音垂線聲乾

葉下條雨中漚點隨流水風裏絲雲橫碧霄虛飄飄比  
時富貴猶堅牢

字彙寢雨貌漚點水中小泡楞嚴經云如湛巨海流一  
浮漚起滅無從白樂天詩大都好物不堅牢絲雲易散

脆弱

劉監倉家煎米粉作餅子余云為甚酥潘邠老  
家造逡巡酒余飲之云莫作醋錯著水來否後  
數日余攜家飲郊外因作小詩戲劉公求之

野飲花閒百物無杖頭惟挂一葫蘆已傾潘子錯著水  
更覓君家為甚酥

贈包安靜先生二首

皓色生甌面堪稱雪見羞東坡調詩腹今夜睡應休自

注 偶謁大中精藍中故人烹

日注茶果不虛故詩以記之

五代劉鄩有妾名花見  
羞雪見羞三字本此

建茶三十片不審味如何奉贈包居士僧房戰睡魔

公自

注昨日點日注極佳點此復云罐中餘者可示及舟中滌神耳

茶經歷代貢茶皆以建寧為上國史補建州有先春龍焙茶錄建人以鬪茶為茗戰胡嶠茶詩破睡當封不夜侯

元祐元年二月八日朝退獨在起居院讀漢書  
儒林傳感申公故事作小詩一絕

寂寞申公謝客時自言已見穆生幾綰藏下吏明堂廢

又作龍鍾病免歸

漢書儒林傳申公魯人也少與楚元王交俱事齊人浮丘伯在長安元王遣子郢與申公俱卒學元王薨郢嗣立為楚王令申公傳太子戊戊不好學病申公及戊立為王胥靡申公申公媿之歸魯退居家教終身不出門復謝賓客蘭陵王臧及代趙綰皆從受詩綰臧請立明堂以朝諸侯不能就其事乃言師申公於是上使使來帛加璧安車以蒲累輪駕駟迎申公至見上上問治亂之事申公時已八十餘老對曰為治不在多言顧力行何如耳上默然是時竇太后喜老子言不悅儒術得綰臧之過以讓上上因廢明堂事下綰臧吏皆自殺申公亦病免歸數年卒穆生事已見十五卷次韻潛師放魚詩注

初貶英州贈馬夢得

萬古仇池穴歸心負雪堂殷勤竹裏夢猶自數山王

杜子美詩萬古仇池穴潛通小有天雪堂在黃州府治東顧延之詠竹林七賢以山王貴盛點之乃作五君詠

贈虔州慈雲寺鑒老

居士無塵堪洗沐道人有句借宣揚牕閒但見蠅鑽紙  
門外惟聞佛放光徧界難藏真薄相一絲不挂且逢場  
卻須重說圓通偈千眼薰籠是法王

蠅鑽紙佛放光注已見一絲不挂逢場作戲皆禪宗語  
釋典菩薩千手目與一手指同又十六開士於浴堂證悟本因於薰籠焙浴具得大安樂法華經法王  
無上尊圓覺經註佛為萬法之王又曰空王

洗兒

人皆養子望聰明我被聰明悞一生惟願孩兒愚且魯  
無災無難到公卿

過子忽出新意以山芋作玉糁羹色香味皆奇  
絕天上酥陀則不可知人間決無此味也

唐本草芋

有六種白芋真芋連禪紫芋並毒少正可煮  
啖之兼肉作羹甚佳蹲鵠之饒蓋謂此也

香似龍涎仍釀白味如牛乳更全清莫將南海金鑾膾  
輕比東坡玉糁羹

香譜龍涎於香品中最貴重出大食國海傍多亦不過  
製兩上品曰泛水次曰滲沙維摩經阿難白佛言憶念  
昔時世尊身病有小疾當用牛乳又杜子  
美泉眼詩香美勝牛乳金鑾繪注已見

擗菜并引

吾借王參軍地種菜不及半畝而吾與過子終年  
飽菜夜半飲醉無以解酒輒擗菜煮之味含土膏  
氣飽風露雖梁肉不能及也人生須底物而更貪  
耶乃作四句

秋來霜露滿東園蘆菔生兒芥有孫我與何曾同一飽

# 不知何苦食鷄豚

晉書何曾傳性豪奢務極華侈日食萬錢猶曰無下箸處

## 食檳榔

月照無枝林夜棟立萬礎眇眇雲間扇蔭此九月暑上有垂房子下繞絳刺禦風欺紫鳳卵雨暗蒼龍乳裂包一墮地還以皮自煮北客初未諳勸食俗難阻中虛畏泄氣始嚼或半吐吸津得微甘著齒隨亦苦面目太嚴冷滋味絕媚嫵誅彭勲可策推轂勇宜賈瘴風作堅頑

導利時有補藥儲固可爾果錄詎用許先生失膏梁便  
腹委敗鼓日啖過一粒腸胃為所侮蟄雷殷臍腎藜藿  
腐亭午書燈看膏盡鉢漏歷歷數老眼怕少睡竟使赤  
背努渴思梅林嚙饑念黃獨舉奈何農經中收此困羈  
旅牛舌不餉人一斛肯多與乃知見本偏但可酬惡語

異物志 檳榔樹若筍竹生竿近上木五六尺閒洪腫起  
如癩木焉因坼裂出若黍秀也無花而為實大如桃李  
天生棘重累其下所以禦衛其實也味苦澀剖其上皮  
煮其膚熟而食之堅如乾棗彼方珍之以為口食甚含  
南方草木狀交廣人凡貴勝族客必先呈此果若邂逅  
不設用相嫌恨本草主治消穀逐水除痰澼殺三虫宣

利臟腑壅滯破胸中氣嶺南人噉之當果實以祛瘴癥也一名洗瘴丹按彭者三戶之姓彭質彭矯彭居也周成雜字檳榔果也似螺可食李當之藥錄檳榔一名檳門韓昌黎進學解敗鼓之皮世說魏武行役失汲道軍皆渴乃令曰前有大梅林饒子甘酸可以解渴士卒聞之口皆出水來此得及前源本草拾遺陳藏器云黃獨過霜雪枯無苗蓋蹲鷗之類梁劉孝綽詠有人乞牛舌乳不付因餉檳榔詩云云宋劉穆之貧時從妻兄江氏乞檳榔江曰檳榔消食君苦飢何須此後尹丹陽以金盤斛許誇示之

### 儋耳山

突兀隘空虛他山總不如君看道傍石盡是補天餘

詩小雅他山之石可以攻玉列子天亦物也物有不足故昔者女媧氏鍊五色之石以補其闕

夜坐與邁聯句

清風來無邊明月翳復吐  
坡松聲滿虛空竹影侵半戶  
邁暗枝有驚鵠壞壁鳴饑鼠  
坡露葉耿高梧風螢落空廡  
微涼感團扇古意歌白紵樂哉今夕游獲此陪杖屢  
邁傳家詩律細已自過宗武短詩膝上成聊以感懷祖  
坡

古樂府有白紵辭杜子美詩晚節漸於詩  
律細又集中有示宗武詩懷祖事屢見

曹溪夜觀傳燈錄燈花燒一僧字上口占

山堂夜岑寂燈下看傳燈不覺燈花落茶毗一箇僧

釋典天竺第九祖入滅衆以香油旃  
檀闍維真體闍維即茶毗焚燒也

施註蘓詩卷四十

集部

欽定四庫全書  
蒼要卷一萬四千九百九十二

施註蘓詩卷四十一

宋蘇軾撰

宋施元之註

武進邵長蘅刪補

和陶淵明詩引

子由作

東坡先生謫居儋耳寘家羅浮之下獨與幼子過負擔度海葺茅竹而居之日啖蕷芋而華屋玉食之念不存於胸中平生無所嗜好以圖史為園囿文章為

鼓吹至是亦皆罷去猶獨喜為詩精深華妙不見老人衰憊之氣是時轍亦遷海康書來告曰古之詩人有擬古之作矣未有追和古人者也追和古人則始於東坡吾於詩人無所甚好獨好淵明之詩淵明作詩不多然其詩質而實綺癯而實腴自曹劉鮑謝李杜諸人皆莫及也吾前後和其詩凡一百有九篇至其得意自謂不甚媿淵明今將集而併錄之以遺後之君子其為我志之然吾於淵明豈獨好其詩也如

其為人實有感焉淵明臨終疏告儼等吾少而窮苦  
每以家弊東西游走性剛才拙與物多忤自量為已  
必貽俗患俛仰辭世使汝等幼而饑寒淵明此語蓋  
實錄也吾真有此病而不蚤自知平生出仕以犯世  
患此所以深愧淵明欲以晚節師範其萬一也嗟乎  
淵明不肯為五斗米一束帶見鄉里小兒而子瞻出  
仕三十餘年為獄吏所折困終不能悛以陷大難迺  
欲以桑榆之末景自託於淵明其誰肯信之雖然子

瞻之仕其出處進退猶可攷也後之君子其必有以處之矣孔子曰述而不作信而好古竊比於我老彭孟子曰曾子子思同道區區之迹蓋未足以論士也轍少而無師子瞻既冠而學成先君命轍師焉子瞻嘗稱轍詩有古人之風自以為不若也然自斥居東坡其學日進沛然如川之方至其詩比李太白杜子美有餘遂與淵明比轍雖馳驟從之而常出其後其和淵明轍繼之者亦一二焉紹聖丁丑十二月十九

日海康城南東齋引

追和陶淵明詩六十二首

飲酒二十首并引

吾飲酒至少常以把盞為樂往往頹然坐睡人見  
其醉而吾中了然蓋莫能名其為醉為醒也在揚  
州飲酒過午輒罷客去解衣槃礴終日歡不足而  
適有餘因和淵明飲酒二十首庶以彷彿其不可  
名者示舍弟子由量無咎學士量無咎名補之時  
通判揚州事見三

題無咎詩註

我生不如陶

一作我不  
如陶生

世事纏綿之云何得一適亦有

如生時寸田無荆棘佳處正在茲縱心與事往所遇無

復疑偶得酒中趣空杯亦常持

二豪詆醉客氣湧胸中山漼然似冰釋亦復在一言嗚  
氣實其腹云當享長年少飲得徑醉此祕君勿傳

晉劉伶傳為酒德頌曰有貴介公子搢紳處士聞吾風  
聲議其所以先生方捧腹承槽銜杯漱醪無思無慮其  
樂陶陶兀然而醉恍然而醒二豪侍側焉知蹀羸之與  
螟蛉又互見前江表傳孫權曰朕年六十世事難易靡

所不嘗近為鼠子所卻令人氣湧如山  
老子渙若冰將釋又虛其實其腹

道喪士失已出語輒不情江左風流人醉中亦求名淵  
明獨清真談笑得此生身如受風竹掩冉衆葉驚俯仰  
各有態得酒詩自成

唐文藝傳 胡楚賓屬文

敏基必酒 中然後下筆

蠹蠕食葉蟲仰空慕高飛一朝傳兩翅乃得黏網悲啁  
啾同巢雀沮澤疑可依赴水生兩殼遭閑何時歸二蟲  
竟誰是一笑百念衰幸此未化間有酒君莫違

陸龜蒙蠧化橘之蠹大如小指蠶葉如饑蠶之速蛻為  
蝴蝶聳空翅輕臂然而去須臾犯蝥網而膠之引絲還  
纏牢若拳梏禮記季秋之月爵入大水為蛤

小舟真一葉下有暗浪喧夜棹醉中發不知枕几偏天  
明問前路已度千金山嗟我亦何為此道常往還未來  
寧蚤計既往復何言

百年六十化念念竟非是是身如虛空誰受譽與毀得  
酒未舉杯喪我固忘爾倒牀自甘寢不擇營與綺

莊子齊物論今也  
吾喪我子知之乎

頃者大雪年海波翻玉英有士常痛飲饑寒見真情牀  
頭有敗榼孤坐時一傾未能平體粟且復澆腸鳴脫衣  
裹凍酒每醉念此生

趙飛燕外傳露立閉息順氣體溫舒無軫粟已見

我坐華堂上不改麋鹿姿時來蜀岡頭喜見霜松枝心  
知百尺底已結千歲奇煌煌凌霄花纏繞復何為舉觴  
酌其根無事莫相羈

白樂天詩有木名凌霄擢秀非孤標偶依一  
株樹遂抽百尺條託根附樹身開花寄樹梢

芙蓉在秋水時節自闔開清風亦何意入我芝蘭懷一  
隨採折去永與江湖乖斷絲不復續斗水何足栖不如  
玉井蓮結根天池泥感此每自慰吾事幸不詩醉中有  
歸路了了初不迷乘流且復逝抵曲吾當迴

李白憶舊遊詩秋水出芙蓉天然去雕飾韓退之詩太  
華峰頭玉井蓮開花十丈藕如船再見維摩經高原陸  
地不生蓮花卑溼淤泥乃生此花  
漢賈誼傳乘流則逝得坎則止

籃輿兀醉守路轉古城隅酒力如過雨清風消半途前  
山正可數後騎且勿驅我緣在東南往寄白髮餘遙知

萬松嶺下有三畝居

民勞吏無德歲美天有道暑雨避麥秋溫風送蠶老三  
疊初有聞一溉未濡槁詔書寬積欠父老顏色好再拜  
賀吾君獲此不貪寶頽然笑阮籍醉几書謝表

嵇叔夜養生論為稼於湯世必一溉者後枯再見晉阮  
籍傳文帝讓九錫公卿將勸進使籍為其辭籍方據案  
醉眠使者以告籍便書案使寫之無所改竄互見十二  
卷京師哭任遵聖詩注按元祐七年五月先生守揚州  
上奏略曰今大姓富家為市易所破十無一二其餘小  
民大率皆有債欠臣親見兩浙京西淮南之民皆為積  
欠所壓日就窮蹙本州於理合放而於條未有明文者  
且令權住催理聽候指揮伏望特留聖意深詔左右大

臣早賜果決行下六月十六日又上奏曰今夏田一熟  
民於百死之中微有生意而監司爭言催欠臣敢昧死  
請內降手詔一應淮南東西浙西諸般欠負不問新  
舊特與權住催理一年此詩所述蓋是得請故也

我夢入小學自謂總角時不謂有白髮猶誦論語辭人  
間本兒戲顛倒略似茲唯有醉時真空洞了無疑墜車  
終無傷莊叟不吾欺呼兒具紙筆醉語輒錄之

詩國風總角之宴言笑晏晏注云總角結髮也杜子美  
春夜行呼兒具紙筆隱几臨軒檻作詩呻吟內墨淡字

頌歌

醉中雖可樂猶是生滅境云何得此身不醉亦不醒癡

如景升牛莫保尻與領黠如東郭魏束縛作毛穎迺知  
嵇叔夜非坐虎文炳

晉桓溫傳劉景升有千斤大牛噉芻豆十倍常牛負重  
致遠曾不若一羸特魏武入荊州以享軍士韓退之毛  
穎傳居東郭者號曰穎蒙將軍拔其毫載穎而歸聚其  
族而加束縛焉晉嵇康傳字叔夜美詞氣有風儀而土  
木形骸不自藻飾後為鍾會譖於文帝而害之

我家小馮君天性頗醇至清坐不飲酒而能容我醉歸  
休要相依謝病當以次豈知山林士骯髒迺爾貴乞身  
當念蚤過是恐少味

小馮君出漢書馮奉世傳詩意謂子由也

去鄉三十年風雨荒舊宅惟存一束書寄食無定迹每用愧淵明尚取禾三百頑然六男子麤可傳清白於吾豈不多何事復歎惜

韓退之示兒詩始我來京師止攜一束書漢楊震傳子孫常蔬食步行或令為開產業震不肯曰使後世稱為清白吏子孫以此遺之不亦厚乎

嘵嘵六男子弦誦各一經復生五丈夫戢戢丁欲成歸田了門戶與國充踐更普兒初學語玉骨開天庭淮老

如鶴雛破殼已長鳴舉酒屬千里一歡愧凡情

揚子曉曉之學各習其師史記孔子弟子傳商瞿年長無子瞿母請之孔子曰無憂瞿年四十後當有五丈夫子唐食貨志凡民始生黃四歲為小十六為中二十一為丁六十為老韓退之寄盧仝詩去歲生兒名添丁意令與國充耘耔漢吳王濞傳注服虔曰以當為更卒出錢二百謂之過更自行為卒謂之踐更

淮海雖故楚無復輕揚風齋廚聖賢雜無事時一中誰言大道遠正賴三杯通使君不夕坐衙門散刀弓

尚書淮海惟揚州史記貨殖傳自淮以北西楚也其俗剽輕李濟翁資暇錄揚州者以其土俗輕揚故名其州今作楊柳之楊繆也魏徐邈傳醉客謂酒清者為聖人濁者為賢人屢見

何人築東臺一郡坐可得亭亭古浮圖獨立表衆惑蕪  
城闕興廢雷塘幾開塞明年起華堂置酒弔亡國無令  
竹西路歌吹久寂默

釋氏要覽梵語塔婆此云高顯文選鮑昭蕪城賦注云  
昭見廣陵故城荒蕪乃吳王濞所都也遂為此賦唐地  
理志揚州江都縣東十一里有雷塘貞觀十八年長史李襲譽引渠以溉田

鼂子天麒麟結交及未仕高才固難及雅志或類已各  
懷伯業能共有丘明恥歌呼時就君指我醉鄉里吳公  
門下客賈誼獨見紀請作鵬鳥賦我亦得坎止行樂當

及時綠髮不可恃

英雄記魏太祖稱長大而能勤學者惟吾與  
袁伯業耳山陽太守袁遺字伯業見魏武紀

蓋公偶談道齊相獨識真頹然不事事客至先飲醇當  
時劉項罷四海瘡痍新三杯洗戰國一斗消彊秦寂寞  
千載後陽公嗣前塵醉卧客懷中言笑徒多勤我時閱  
舊史獨與三人親未暇餐脫粟苦心學平津草書亦何  
用醉墨淋衣巾一揮三十幅持去聽坐人

漢曹參傳為齊相膠西蓋公為言治道貴清淨而民自  
定及為相日夜飲酒賓客欲有言輒飲以醇酒醉而後

去終莫得開說唐陽城傳為諫議大夫日夜劇飲客欲  
諫止者城揣知其情強飲客客辭即自引滿或先醉臥  
客懷中漢公孫弘傳為丞相封平津侯身食一肉脫粟  
飯南史齊高帝諸子新浦侯子雲善草隸百濟使人求  
書曰侍中尺牘之美遠流海外今日  
所求惟在名迹子雲書三十紙與之

歸園田居六首

東坡曾孫叔子名峴刻所藏真  
迹於泉南舶司間與集本不同

當是集本有  
誤今從石本

三月四日游白水山佛迹巖沐浴於湯泉晞髮於

懸瀑之下浩歌而歸肩輿卻行以與客言不覺至

荔支浦上晚日葱蘢竹陰蕭然荔子纍纍如芡實

矣有父老年八十五指以告余及是可食公能攜  
酒來游乎意欣然許之歸臥既覺聞兒子過誦淵  
明歸園田居詩六首乃悉和一作次

次

其韻始余在廣

陵和淵明飲酒二十首今復為此要當盡和其詩

迺已耳

一本云今書以寄妙總大士參寥子

環州多白水際海皆蒼山以彼無盡景寓我有限年東  
家著孔丘西家著顏淵市為不二價農為不爭田周公  
與管蔡恨不茅三間我飽一飯足薇蕨補食前門生餽

薪米救我厨無烟斗酒與隻雞酣歌餞華顛禽魚豈知  
道我適物自閒悠悠未必爾聊樂我所然

魏志邴原別傳嘗游學諸孫崧崧曰君鄉里鄭君學者  
師模也君乃舍之所謂以鄭為東家丘也原曰君謂僕  
以鄭為東家丘君以僕為西家愚夫邪說苑虞人與芮  
人質其成於文王二國相謂讓其所爭以為閑田宋武  
二王傳論襄陽龐公謂劉表曰若使周公與管蔡處茅  
屋之下食藜藿之羹豈有若斯之難云云食前用蓋子

食前方

文字

窮猿既投林疲馬初解鞅心空飽新得境熟夢餘想江  
鷗稍馴集瑩叟已還往南池綠錢生北嶺紫筍長提壺

豈解飲好語時見廣春江有佳句我醉墮渺莽

新浴覺身輕新沐感髮稀風平懸瀑下卻行詠而歸仰  
觀江搖山俯見月在衣步從父老語有約吾敢違

老人八十餘不識城市娛造物偶遺漏同儕盡丘墟平  
生不渡江水北有幽居手插荔支子合抱三百株莫言  
陳家紫甘冷恐不如君來坐樹下飽食攜其餘歸舍遺  
兒子懷抱不可虛有酒持飲我不問錢有無

史記律書文帝時人民樂業自年六七十翁未嘗至市  
井蔡君謨荔支譜興化軍風俗園池勝處惟種荔支尤

重陳紫富室大家歲或不嘗雖別品千計不為薄意陳氏欲採摘必先閉戶隔牆入錢得者自以為幸不敢較其直之多少也君謨所述閩中諸郡荔子以陳家紫為第一

坐倚朱藤杖行歌紫芝曲不逢商山翁見此野老足願

同荔支社長作鷄黍局教我同光塵月固不勝燭公自生莊

子曰月固不勝火郭象曰大而闇不若小而明陋哉斯言也予為更之曰明於大者必晦于小月能燭天下而不能燭毫釐此其所以不勝火也然卒之火勝耶月勝耶

霜飈散氣祲廓然似朝旭

昔我在廣陵悵望柴桑陌長吟飲酒詩頗獲一笑適當時已放浪朝坐夕不夕矧今長間人一劫展過隙江山

互隱見出沒為我役斜川追溯明東皋友王績詩成竟  
何為六博本無益

詩小雅邦君諸侯莫肯朝夕禮記朝不廢朝夕不廢夕左傳百官承事朝而不夕唐王績海北山東臯著書自號東臯子宋玉招魂箇蔽象棋有六博些注云投六箸行六棋故謂之六博

形贈影

天地有常運日月無閒時孰居無事中作止推行之細察我與汝相因以成茲忽然乘物化豈與生滅期夢時我方寂偃然無所思胡為有哀樂輒復隨漣漪我舞汝

凌亂相應不少疑還將醉時語答我夢中辭

莊子天運篇天其運乎地其運乎日月其爭於所乎孰主張是孰維綱是孰居無事推而行是互見前

影答形

丹青寫君容常恐畫師拙我依月燈出相宵兩奇絕妍  
形本在君我豈相媚悅君如火上煙火盡君迺別我如  
鏡中像鏡壞我不滅雖云附陰晴了不受寒熱無心但  
因物萬變豈有竭醉醒皆夢耳未用議優劣

圓覺經由寂靜故十方世界諸  
如來心於中顯現如鏡中像

神釋

二乎本無我其初因物著豈惟老變衰念念不如故知君非金石安足長託莫從老君言亦莫用佛語仙山與佛國終恐無是處甚欲隨陶翁移家酒中住醉醒要有盡未易逃諸數平生逐兒戲處處餘作具所至人聚觀指目生毀譽如今一弄火好惡都焚去既無負載勞又無寇攘懼仲尼晚乃覺天下何思慮

陶淵明飲酒詩一士長獨醉一夫終年醒醒醉還相笑發言各不領寄言酌中客日沒燭當炳周易繫辭子曰

天下何思何慮天下同

卷四十一

歸而殊塗一致而百慮

### 詠二疏

二疏事漢時迹寓心已去許侯何足道寧識此高趣可憐魏丞相免冠謝陋舉中興多名臣有道獨兩傳世途方轂擊誰肯行此路是身如委蛻未蛻何所顧已蛻則兩忘身後誰毀譽所以遺子孫買田豈先務我嘗遊東海所歷若有素神交久從君屢夢今乃悟淵明作詩意妙想非俗慮庶幾二大夫見微而知著

漢疏廣傳東海蘭陵人也地節三年立皇太子廣為太  
傅兄子受為少傅太子外祖平恩侯許伯白使其弟舜  
監護太子家宣帝以問廣曰不宜獨親外家上善其言  
以語丞相魏相相免冠謝曰此非臣所及莊子知北遊  
生非汝有是天地之委和也性命非汝有是天地之委  
順也子孫非汝有是天地之委蜕也越絕書子胥曰聖  
人見微知著始知已

詠三良

子車氏奄息仲行  
鍼虎秦之良臣也

此生太山重忽作鴻毛遺三子死一言所死良已微賢  
哉晏平仲事君不以私我豈犬馬哉從君求蓋帷殺身  
固有道大節要不虧君為社稷死我則同其歸顧命有

治亂臣子得從違魏顆真孝愛三良安足希仕宦豈不  
榮有時纏憂悲所以靖節翁服此黔婁衣

漢司馬遷傳死有重於泰山有輕於鴻毛用之所趣異  
也禮記仲尼之畜狗死使子貢埋之曰敝帷不弃為埋  
狗也左傳襄二十五年齊崔杼弑其君光晏子立於崔  
氏之門外曰君為社稷死則死之為社稷亡則亡之若  
為已死而為已亡非其私暱誰敢往之魏顆從父治命  
事在左傳宣十五年詳卷四送蔡冠卿詩注陶詠貧士  
詩安貧守賤者自古有黔婁好爵吾不縻  
厚饋吾不酬一旦壽命盡弊服仍不周

詠荊軻

秦如馬後牛呂氏非復羸天欲厚其毒假手李客卿功

成志自滿積惡如陵京滅身會有時徐觀可安行沙丘  
一狼狽笑落冠與纓太子不少忍顧非萬人英魏韓裂  
智伯肘足本無聲胡為棄成謀託國此狂生荆軻不足  
說田子老可驚燕趙多奇士惜哉亦虛名殺父因其母  
此豈容天庭亡秦只三戶況我數十城漸離雖不傷陛  
戟加周營至今天下人愍燕欲其成廢書一太息可見

### 千古情

晉元帝紀初玄石圖有牛繼馬後故宣帝深忌牛氏而  
以毒酒鴆殺其將牛金而恭王妃夏侯氏竟通小吏牛

氏而生元帝亦有符云史記秦本紀秦之先柏醫佐舜賜姓嬴氏莊襄王為秦質子於趙見呂不韋姬悅而取之生始皇名為政姓趙氏呂不韋傳不韋取邯鄲諸姬與居知有身以獻秦質子楚生子政立為王是為始皇帝左傳昭四年司馬侯曰楚王方侈天其或者欲逞其心以厚其毒而降之罰史記李斯傳為秦相呂不韋舍人因以得說秦王拜為客卿卒用其計謀竟并天下詩小雅如岡如陵又如坻如京鄭氏云京大也史記秦始皇紀崩於沙丘平臺趙高與公子胡亥丞相斯詐為受遺詔沙丘立胡亥為太子賜公子扶蘿死潘安仁西征賦云據天位其若茲亦狼狽而可愍謂始皇也滑稽傳淳于髡仰天大笑冠纓索絕史記燕世家秦兵臨易水燕太子丹陰養壯士使荆軻襲刺秦王秦覺殺軻擊燕燕斬丹以獻史記魏世家當晉六卿之時知氏最强率韓魏之兵以圍趙襄子於晉陽魏桓子肘韓康子韓康子履魏桓子肘足接於車上而知氏地分身死國亡為

天下笑史記荆軻傳田光見荆卿欲自殺以激荆卿因  
自刎而死呂不韋傳嫪毐事連相國呂不韋出就國不  
韋自度稍侵見誅乃飲酖而死劉向說苑茅焦對秦始  
皇帝曰陛下車裂假父有嫉妒之心橐撲兩弟有不慈  
之名遂母貧陽有不孝之行從漢藜於諫士有桀紂之  
治漢項籍傳楚雖三戶亡秦必楚荆軻傳軻善擊筑者  
高漸離秦既逐荆軻之客惜其善擊筑重赦之乃膾其  
目使擊筑漸離乃以鉛置筑中舉筑朴始皇不中遂誅  
漸離終身不近諸侯之人

### 答龐參軍

周循州彥質在郡二年書問無虛日罷歸過惠為  
余留半月既別和此詩追送之

我見異人且得異書挾書從人何適不娛羅浮之趾卜  
我新居子非玄德三顧我廬

旨酒荔蕉絕甘分珍雖云晚接數面自親海隅一笑豈  
云無人無酒酤我或乞其鄰

漢司馬遷傳李陵素與士大夫絕甘分少再見陶龐參軍詩序謬云數面成親舊况其情過此者乎再見

將行復止眷言孜孜苟有於中傾倒出之奕奕千言粲  
焉陳詩觴行筆落了不容思

妙侍側兩髦了分歌舞壽我永為歡欣曲終悽然仰

視浮雲此曲此聲何時復聞

韓退之傳捧書隨諸兄累累角尚

非詩國風冕彼兩髦實維我儀

擊鼓其镗船開艤鳴顧我而言雨泣載零子卿白首當  
還西京遼東萬里亦歸管寧

詩國風擊鼓其镗又涕零如雨漢蘓武傳字子卿在匈奴十九歲始以強壯出及還鬚鬢盡白

感子至意託辭西風吾生一塵寓形空中願言謙亨君  
子有終功名在于何異我躬

貧士七首

余遷惠州一年衣食漸窘重九俯邇

一作將近

樽俎蕭

然乃和淵明貧士七篇以寄許下高安宜興諸子

姪并令過同作

長庚與殘月耿耿如相依以我旦暮心惜此須臾暉青  
天無今古誰知織烏飛我欲作九原獨與淵明歸俗子  
不自悼顧憂斯人饑堂堂誰有此千駟良可悲

史記齊世家景公坐栢  
寢歎曰堂堂誰有此乎

夷齊恥周粟高歌誦虞軒產祿彼何人能致綺與園古

來避世士人一作死灰或餘煙末路益可羞朱墨手自研

淵明初亦仕絃歌本誠言不樂迺徑歸視世差獨賢

漢張良傳呂后令呂澤卑辭厚禮迎此四人顏師古曰謂東園公綺里季夏黃公角里先生再見晉陶潛傳嘗謂親朋曰聊欲絃歌以為三徑之資可乎執事者聞之以為彭澤令

誰謂淵明貧尚有一素琴心間手自適寄此無窮音佳辰愛重九芳菊起自尋疎巾歎虛漉塵爵笑空斟忽餉二萬錢顏生良足欽急送酒家保勿違故人心

南史陶潛傳顏延之在潯陽與潛情款後為始安郡臨去留二萬錢與潛潛悉送酒家稍就取酒漢樂布傳賣

庸於齊為  
酒家保

人皆有耳目夫子曠與妻弱毫寫萬象水鏡無停酬閒  
居惜重九感此歲月周端如孔北海只有樽空憂二子  
不竝世高風雨無傳我復五百年清夢未易求

芙蓉雜金菊枝葉長闌干遙憐退朝人餚酒出太官豈  
知江海上落英亦可餐典衣作重九徂歲一作暑慘將一作

多寒無衣粟一作寒我膚無酒顰我顏貧居真可歎二事

長相關

國朝故事九月九日以花餠法酒賜近臣西京雜記漢武帝宮人賈佩蘭九月九日佩茱萸囊食餠飲菊花酒云令人長壽方言餠即餠或謂之餐

老詹亦白髮

公自注惠州太守詹範字惠之

相對垂霜蓬賦詩殊有味

涉世非所工杖藜山谷閒狀類渤海龔半道要我飲意

與王弘同有酒我自至不須遣龐通門生與兒子杖屨

聊相從

南史陶潛傳江州刺史王弘欲識之不能致也潛嘗往廬山弘令潛故人龐通之齋酒具於半道栗里要之潛使一門生二兒舉藍輿及至欣然便共飲酌俄頃弘至亦無忤也互見前

我家六兒子流落三四州辛苦見

一作更

不識今與農圃

儔買田帶修竹築室依清流未能遣一方分汝薪水憂

坐念北歸日此勞未易酬我獨遺以安鹿門有前修

陶潛傳為彭澤令送一力給其子曰今遣此力助汝薪水之勞此亦人子也可善遇之再見

### 九日閒居

明日重九雨甚展轉不能寐起索酒和淵明一篇

醉熟昏然殆不能佳也

九日獨何日欣然愜平生四時靡不佳樂此古所名龍

山憶孟子栗里懷淵明鮮鮮霜菊艷溜溜糟牀聲閒居  
知令節樂事滿餘齡登高望雲海醉覺三山傾長歌振  
履商起舞帶索榮坎坷識天意淹留見人情但願飽杭  
稌年年樂秋成

新序原憲曳杖拖履行歌商頌聲滿天地如出金石列  
子天瑞篇孔子游於太山見榮啟期鹿裘帶索鼓琴而  
歌

己酉歲九月九日

十月初吉菊始開迺與客作重九因次淵明己酉

九月九日一首胡廣飲菊潭而壽然李固傳贊云  
其視胡廣猶糞土也

今日我重九公自注海南氣候不常有  
月即中秋有菊即重陽誰謂秋冬交黃

花與我期草中實後凋香餘白雲乾色映青松高悵望  
南陽野古潭霏慶宵伯始真糞土平生夏畦勞飲此亦  
何益內熱中自焦持我萬家春一酌五柳陶夕英幸可

掇繼此木蘭朝

漢地理志南陽郡穰縣屬荊州古潭指穰縣菊水也胡  
廣字伯始飲水愈疾事詳三十七卷以黃子木拄杖壽

子由  
詩注

歲暮作和張常侍

十二月二十五日酒盡取米欲釀米亦竭時吳遠

游陸道士皆客於余因讀淵明歲暮和張常侍詩

亦以無酒為歎乃用其韻贈二子

吳遠游名復古字子野事見三

十八卷次韻子由贈吳子野先生詩注陸道士名惟忠字子厚始見東坡於黃州惟忠作詩論内外丹自以為決不死坡告之曰子神清而骨寒其清可以仙其寒亦足以死後十五年復見於惠曰吾真坐寒而死矣紹聖四年卒坡為銘其墓坡嘗以文祭張安道云某於天下未嘗誌

墓獨銘五人皆盛德故如惟忠吳遠游輩於公  
困危流離之中追隨不捨惟忠不幸而死故獨  
得公為銘以垂千載  
是亦可謂知所託矣

我生有天祿玄膺流玉泉何事陶彭澤乏酒每形言仙  
人與道士自養豈在繁但使荆棘除不憂梨棗愆我年  
六十一頽景薄西山歲暮似有得稍覺散亡還有如千  
丈松常苦弱蔓纏養我歲寒枝會有解脫年米盡初不知  
但怪饑鼠遷二子真我客不醉亦陶然

漢食貨志酒者天之美祿黃庭經舌下玄膺死生岸出  
清入玄二氣渙于若得之昇天漢注云玄膺通津液之

岸也管受精符揚雄  
反騷恐日薄於西山

### 游斜川

#### 正月五日與兒子過出游作

謫居澹無事何異老且休雖過靖節年未失斜川游春江渌未波人臥船自流我本無所適汎汎隨鳴鷗中流遇伏洞捨舟步曾丘有口可與飲何必逢我儔過子詩似翁我唱而輒酬未知陶彭澤頗有此樂不問點爾何如不與聖同憂問翁何所笑不為由與求

陶淵明游斜川詩開歲倏五十吾生行歸休楚辭卜居泛泛若水中之鳧隨波上下偷以全吾軀南史袁粲傳道遇一士大夫便呼與飲明日此人謂被知顧到門求進粲曰昨飲酒無偶聊相要耳

郭主簿二首

清明日聞過誦書聲節間美感念少時悵焉追懷先君宮師之遺意且念淮德二幼孫無以自遣迺和淵明二篇隨意所寓無復倫次也

今日復何日高槐布初陰良辰非虛名清和盈我襟孺予卷書坐誦詩如鼓琴卻去四十年玉顏如汝今閉戶

未嘗出出為鄰里欽家世事酌古百史手自斟當年二  
老人喜我作此音淮德入我夢角羈未勝簪孺子笑問  
我君何念之深

禮記翦髮為鬢男角女羈

注云夾角曰角午達曰羈

雀鷗含淳音竹萌抱靖

一作節

公自注此兩句先君

少時詩失其全篇

誦

我先君詩肝肺為澄澈猶如鳴鶴和未作獲麟絕願因  
騎鯨李追此御風列丈夫貴出世功名豈人傑家書三  
萬卷獨取服食訣地行即空飛何必挾日月

楞嚴經衆生堅固服餌而不休息食道圓成名地行仙  
堅固草木而不休息藥道圓成名飛行仙互見前莊子  
山木篇昭昭乎如揭日月而行

示周掾祖謝

游城東學舍作

聞有古學舍竊懷淵明欣攝衣造兩塾窺戶無一人邦  
風方祀夷廟貌猶殷因先生饌已缺弟子散莫臻忍饑  
坐談道嗟我亦晚聞永言百世祀未補平生勤今此復  
何國豈與陳蔡鄰永媿虞仲翔弦歌滄海濱

三國吳虞翻傳字仲翔徙交州雖處  
罪放而講學不倦門徒常數百人

贈羊長史

得鄭會嘉靖老書欲於海舶載書千餘卷見借因  
讀淵明贈羊長史詩云愚生三季後慨然念黃虞  
得知千載事上賴古人書次其韻以謝鄭君

我非皇甫謐門人如摯虞不持兩鴟酒肯借一車書欲  
令海外士觀經似鴻都結髮事文史俯仰六十餘老馬  
不耐放長鳴思服輿故知根塵在未免病藥俱念君千

里足歷塊猶踟躕好學真伯業比肩可相如此書久已  
熟救我今荒蕪顧慙桑榆迫久厭詩酒娛奏賦病未能  
草玄老更疎猶當距楊墨稍欲懲荆舒

晉皇甫謐傳自表就武帝借書帝送一車與之門人摯  
虞等皆為晉名臣兩鴟古語借書一瓶還書一瓶韻注  
瓶通作鴟盛酒器即鴟夷也後漢靈帝紀光和元年始  
置鴻都門學生蔡邕書石經英雄記袁遺字伯業已見  
本卷飲酒詩注詩魯頌荆舒是懲按王  
安石初封荊國公後封舒王詩意指此

乞食

莊周昔貸粟猶欲春脫之魯公亦乞米炊煮尚不辭淵

明端乞食亦不避嗟來嗚呼天下士死生寄一杯斗水  
何所直遠汲苦姜詩幸有餘薪米養此老不才至味久  
不壞可為子孫貽

禮記齊大饑黔敖為食於路以待餓者有餓者來黔敖  
左奉食右執飲曰嗟來食揚其目而視之曰予惟不食  
嗟來之食以至於斯也

胡西曹示顧賊曹

長春如稚女飄颻倚輕颺卯酒暈玉頰紅綃卷生衣低  
顏香自斂含睇意頗微寧當娣一作配黃菊未肯似一作似

戎葵誰言此弱質閨世觀盛衰顰然疑薄怒沃盥未可

揮瘴雨吹蠻風凋零豈容遲老人不解飲短句餘清悲

爾雅長婦謂稚婦為娣娣婦謂長婦為姒宋玉神女賦  
頬薄怒以自持兮曾不可乎犯干左傳僖二十三年晉  
公子重耳之秦秦伯納女  
五人奉匜沃盥既而揮之

移居二首

去歲三月自水東嘉祐寺遷合江樓迨今一年多  
病鮮歡頗懷水東之樂得歸善縣後隙地數畝父  
老云此古白鶴觀也意欣然欲居之迺和此詩

昔我初來時水東有幽宅晨興

一作與

烏鵲朝暮與牛羊

夕誰令遷近市日有造請役歌呼雜閭巷鼓角鳴枕席  
出門無所詣樂事非宿昔病瘦獨彌年束薪與誰折

左傳昭三年齊景公欲更晏子之宅曰子之宅近市湫  
隘囂塵不可以居請更諸爽塏者漢張湯傳造請諸公  
不避

寒暑

洄潭轉磧岸我作江郊詩今為一廛氓此地乃得之葺  
為無邪齋思我無所思古觀廢已久白鶴歸何時我豈  
丁令威千歲復還茲江山朝福地古人不吾欺

時運

丁丑二月十四日白鶴峰新居成自嘉祐寺遷入  
詠淵明時運詩云斯晨斯夕言息其廬似為余發  
也迺次其韻長子邁與余別三年矣挈攜諸孫萬  
里遠至老朽憂患之餘不能無欣然

我卜我居居非一朝龜不吾欺食此江郊廢井已塞喬  
木千霄昔人伊何誰其裔苗

下有澄一作碧潭可飲可濯江山千里供我遐矚木固無

跔瓦豈有足陶匠自至獻歌相樂

我視此邦如洙如沂邦人勸我老矣安歸自我幽獨倚  
門或揮豈無親友雲散莫追

顧野王玉篇洙水出泰山沂水出琅邪縣揚子倚門牆  
則麾之再見王仲宣贈蔡子篤詩風流雲散一別如雨  
旦朝丁丁誰款我廬子孫遠至笑語紛如翦髮一作垂

髫覆此瓠壺三年一夢迺復見余

詩小雅伐木丁丁鳥鳴嚶嚶呂氏春秋款門而謁  
款扣也漢張蒼傳肥白如瓠陳遵傳腹如瓠壺

始經曲阿

虞人非其招欲往畏簡書穆生責醴酒先見我不如江  
左古弱國強臣擅天衢淵明墮詩酒遂與功名疎我生  
值良時朱金義當紓天命適如此幸收廢棄餘獨有媿  
此翁大名難久居不思犧牛龜兼取熊掌魚北郊有大  
賚南冠解囚拘眷言羅浮下白鶴返故廬

揚子使我紓朱懷金其樂不可量也莊子列禦寇子見  
夫犧牛乎衣以文繡食以芻菽及其牽而入於太廟雖  
欲為孤犧其可得乎外物篇神龜能見夢於元君而不  
避余且之網知能七十二鑽而無遺筭不能避剗腸之

惠



施註鯨詩卷四十一

欽定四庫全書薈要卷一萬四千九百九十三

集部

施註蘇詩卷四十二

宋 蘇軾 撰

宋 施元之 註

武進邵長蘅刪補

追和陶淵明詩六十首

讀山海經十三首

淵明讀山海經十三首其七皆仙語余讀抱朴子

有所感用韻賦之

晉葛洪字稚川止羅浮山鍊丹自號抱朴子因以名書

今日天始霜衆木斂以疎幽人掩關卧明景翻空廬開  
心無良友寓眼得奇書建德有遺民道遠我無車無糧  
食自足豈謂穀與蔬媿此稚川翁千載與我俱晝我與  
淵明可作三士圖學道雖恨晚賦詩豈不如

莊子山木篇南越有邑焉名為建德之國其民愚而朴  
少私而寡欲云云君曰彼其道遠而險又有江山我無  
舟車奈何市南子曰君無形倨無留居以為君車君曰  
彼其道幽遠而無人吾誰與為隣吾無糧我無食安得  
而至焉市南子曰少君之費  
寡君之欲雖無糧而乃足

稚川雖獨善愛物均孔顏欲使蟪蛄流知有龜鶴年辛

勤破封蟄苦語劇移山博哉無窮利千載食此言

抱朴子論仙篇或問曰古人推龜鵠於別類以死生為朝暮而吾子乃欲延蟪蛄之命令有歷紀之壽吾子不亦謬乎莊子蟪蛄不知春秋此小年也郭景純游仙詩借問蜉蝣輩寧知龜鵠年

淵明雖中壽雅志仍丹丘遠矣無懷民超然邈無傳奇文出續息宣復生死流我欲作九原異世為三游

莊子上壽百歲中壽八下壽六十楚辭遠遊仍羽人於丹丘兮畱不死之舊鄉陶淵明五柳先生傳酣歌賦詩以樂其志無懷氏之民歟葛天氏之民歟又臨終自為祭文及與儼等疏具集中禮記屬續以俟氣絕

子政信奇逸妙算窮陰陽淮南枕中訣養練歲月長豈

伊與濁中爭此頃刻光安知青藜火丈人非中黃

漢劉向傳字子政淮南枕中鴻寶苑秘書言神仙使鬼物為黃金之術向幼而讀誦以為奇互見十二卷贈王仲素詩注王子年拾遺記劉向正月十五夜校書天祿閣有老人著黃衣植青藜杖見向暗中誦書老人吹杖端烟然因以照坐與向說開闢以前事授以五行洪範之文抱朴子仙藥篇中黃子有服食節度極言篇黃帝適東岱而

奉中黃

亂離棄弱女破冢割恩憐寧知効龜息三歲號窮山長  
生定可學當信仲弓言支牀竟不死抱一無窮年

抱朴子故太丘長陳仲弓篤論士也撰異聞記云其郡人張廣定者遭亂當避有一女年四歲不能步涉又不

可擔負計棄之固當餓死不欲令其骸骨之露村側有  
大古冢先有穿穴乃以器盛縗之下此女於冢中以數  
月許乾飯及水漿與之而捨去後三年廣定乃得還鄉  
欲收所棄女骨其女故坐冢中見其父母猶識之父母  
甚喜初猶恐其鬼也入就之乃知其不死問從何得食  
女言糧初盡時見冢角有一物伸頸吞氣試効之輒不  
復饑日月為之以至於今廣定

索女所言物乃是一大龜耳

二山在咫尺靈藥非草木玄芝生太元黃精出長谷仙  
都浩如海豈不供一浴何當從山火束縕分寸燭

抱朴子微旨論或曰竊聞求生之道當知二山不審此  
山為何所在曰有之夫太元之山難知易求不天不地  
不沈不浮玄芝萬株絳樹時生此一山也長谷之山杳  
杳巍巍玄雲飄飄玉液霏霏有道之士登之不哀採服

黃精以致天飛此二山也皆古賢之所秘子精思之漢廟通傳束縕請火

蜀士李八百穴居吳山陰默坐但形語從者紛如林其後有李寬鷄鵠非同音口耳固多僞識真要在心

抱朴子吳大帝時蜀中有李阿者穴居不食世傳見之號為八百歲翁人往問事阿無所言但瞻顏色後一旦忽去不知所在後有一人姓李名寬到吳而蜀語能呴水治病頗愈於是遠近翕然謂寬為李阿因共呼為李八百而實非也了無治身之要後有見寬者與凡人無異及吳大疫寬亦得溫病死於廬中而事實者猶謂之化形屍解之仙非真死也

黃花冒甘谷靈根固深長葛井窖丹砂紅泉湧尋常二

女戲口鼻

一作耳

松膏以為糧聞此不能寐起坐夜未央

抱朴子南陽鄆縣山中有甘谷水所以甘者谷上下左右皆生甘菊菊花墮其中故水味為癰谷中居民飲甘谷水者無不老壽此菊力也又臨沅縣有民世年百歲或八九十是宅井水殊赤試掘之左右得古埋丹砂數十斛砂汁因泉入井故飲而得壽已見前注又上黨有趙瞿者病癩歷年垂死有仙人以囊藥賜之曰此是松脂耳汝鍊服之可以長生不死瞿服之年百七十歲夜見而上有采女二長二三寸游戲口鼻之間如是且一年此女長如大人在側又嘗聞琴瑟之音欣然獨笑在人間二百許年色如少童乃入抱犧山去必地仙也

談道鄙俗儒遠自太史走仲尼實不死於聖亦何負紫文出吳宮丹雀本無有遼哉廣桑君獨顯三季後

荀子儒効篇德然若終身之虜而不能有他志是俗儒者也抱朴子辨問篇俗儒云聖人所不能則餘人皆不能未聞周孔能為斯事也或曰周孔皆能為此但不為爾吾答之曰必若所云者吾亦可以言周孔皆以昇仙但以此法不可以訓世恐人皆知不死之可得故周孔密自為之而秘不告人吳王伐石以治宮室而於合石之中得紫文金簡之書不能讀使使者持以問仲尼而欺仲尼曰吳王閒居有赤雀銜書以置殿上不知其義故遠詣呈仲尼視之曰此乃靈寶之方長生之法禹之所服隱在水邦年齊天地朝於紫庭者也禹將仙化封之名山石函之中今乃赤雀銜之殆天授也以此論之是夏禹不死也而仲尼又知之安知仲尼不皆密修其道乎

金丹不可成安期渺雲海誰謂黃門妻至道迺近在屍

解竟不傳化去空餘悔丹成亦安用御氣本無待

真誥葛洪內篇漢期門郎程偉妻能通神變化煎水銀成銀偉從受方妻謂偉骨相不應得之逼之不已妻乃屍解去抱朴子云黃門郎莊子逍遙遊乘天地之正而御六氣之辨以遊無窮者彼且惡乎待哉

鄭君故多方玄翁所親指竒文二百篇了未出生死素書在黄石豈敢辭跪履萬法等成壞金丹差可恃

晉葛洪傳從祖玄學道得仙以其鍊丹秘術授鄭隱洪就隱學悉得其法抱朴子余晚充鄭君門人請見方書先以道家訓戒書近百卷稍稍示余余頗以其疑事咨問之鄭君言君才可教也今當以佳書相示久之漸得見短書纏素所寫者積年之中合集所見二百許卷跪履張良事已見仙傳拾遺張良墓於龍首原赤眉之亂

人發其墓但見黃石枕化而飛去得素書一篇云抱朴子鄭君語余曰雜道書卷有佳事但當校其精麤擇所施行若金丹一成此輩一切不用也

古強本妄庸蔡誕亦夸士曼都斥仙人謁帝輕舉止學道未有得自欺誰不爾稚川亦隘人疏錄此庸子

抱朴子昔有古強者食草木之方年八十許尚聰明時人便謂之仙人而強曾畧涉書記頗識古事自言已四千歲敢為虛言言之不怍此皆有名無實使世間不信天下有神仙皆坐此輩以偽亂真也五原有蔡誕者好道而不得佳師廢棄家業走之深山中三年饑凍辛苦久而不堪還家黑瘦骨立不復似人其家問之因欺家云吾未能昇天但為地仙也為老君牧龍因與諸仙博戲忽失此龍以罪見謫送付崑崙山下芸鋤芝草法當

十年乃得原會偓佺子王喬諸仙采按行為吾作刀且  
得放歸於是遂老死矣河東蒲坂有項曼都者入山學  
仙十年而歸家云曾到天上仙人以流霞一杯飲我輒  
不饑渴忽然思家到天帝前謁拜失儀見斥河東因號  
曼都為斥仙人世多此輩

種類非一不可不詳也

東坡信崎人涉世真散材仇池有歸路羅浮豈徒來踐  
蛇及茹蠶心空了無猜攜手葛與陶歸哉復歸哉

莊子喟於人而侔於天仇池注再見又先生常夢至仇  
池詳載桃花源詩引見本卷後韓退之憶昨行踐地茹  
蠶不擇化忽有飛詔從天來伾文  
未渝崖州職雖得赦宥恒愁猜

## 還舊居

# 夢歸白鶴山居作

瘦人常念起夫我豈忘歸不敢夢故山恐興墳墓悲生  
世本暫寓此身念念非鵝城亦何有偶拾鶴毳遺窮魚  
守故治聚沫猶相依大兒當門戶時節供丁推夢與鄰  
翁言憫然憐我衰往來付造物未用相招麾

漢韓王信傳僕之恩歸如瘦人不忘起盲者不忘視莊子魚相喚以溼相濡以沫杜子美詩大兒久在外門戶無人持宋敏求春明退朝錄吳正肅育言律令有丁推推字不通少壯之意當是丁稚唐以高宗諱避之損其點畫爾史記沒黠傳嚴助曰使黠任職居官無以踰人然至其輔少主守城深堅招之不來麾之不去雖自謂

育育亦不  
能奪之矣

止酒并引

丁丑歲余謫海南子由亦貶雷州五月十一日相  
遇於藤同行至雷六月十一日相別渡海余時病  
痔呻吟子由亦終夕不寐因誦淵明詩勸余止酒  
乃和元韻因以贈別庶幾真止矣

時來與物逝路窮非我止與子各意行同落百蠻裏蕭  
然兩別駕各攜一稚子子室有孟光我室惟法喜相逢

山谷間一月同卧起茫茫海南北麤亦足生理勸我師  
淵明力薄且為已微疴坐杯酌止酒則瘳矣望道雖未  
濟隱約見津涘從今東坡室不立杜康祀

唐王績傳所居東南有  
磐石立杜康祠祭之

西田獲早稻

蓬頭三獠奴誰謂愿且端晨興灑掃罷飽食不自安願  
治此圃畦少資主遊觀畫功不自覺夜氣乃潛還早韭  
欲爭春晚菘先破寒人間無正味美好出艱難蚤知農

圃樂豈有非意干尚恨不持鋤未免驛我顏此心苟未  
降何適不間關休去復歇去菜食何所嘆

北史蠻獠傳南方曰蠻其流曰蠻曰僚南史周顥清貧寡欲終日長蔬食文惠太子問菜食何味最勝曰春初早韭秋末晚菘傳燈錄石霜和尚有僧入室石霜云休去歇去

下澗田舍獲

聚糞西垣下鑿泉東垣隈勞辱何時休宴安不可懷天  
公豈相喜雨霽與意諧黃松養土膏老楮生樹鷄未忍  
便烹煮繞觀日百迴跨海得遠信冰槃鳴玉哀茵陳點

膾縷照坐如花開一與蟹叟醉蒼顏兩摧頽齒根日浮  
動自與梁肉乖食菜豈不足呼兒拆鷄栖

左傳閔公元年管敬仲言於齊侯曰宴安酖毒不可懷  
也杜子美詩一日須來一百迴韓退之李花詩冰盤夏  
薦碧實脆杜子美乞瓷盤詩大邑燒瓈輕且堅扣  
如哀王錦城傳又詩棟樹寒雲色茵陳春鴉香

使都經錢谿

游城南謝氏廢園作

喬木卷蒼藤浩浩崩雲積謝家堂前燕對語非宿昔仰  
看桄榔樹玄鶴舞長翩新年結荔子主人黃壤隔谿陰

宜館我稍省薪水役相如賣車騎五畝亦可易但恐鵠  
鳥來此生還蕩析誰能插籬槿護此殘竹柏

赴假金陵夜行

郊行步月作

缺月不蚤出長林踏青冥犬吠主人怒媿此間里情怪  
我夜不歸茜袂窺紫荆雲間與地上待我兩友生驚鶴  
再三起樹端已微明白露淨原野始覺丘陵平暗蛩方  
夜續孤螢亦宵征歸來閉戶坐寸田且默耕莫赴花月

期免為詩酒縈詩人如布穀聒聒常自鳴

擬古九首

有客叩我門  
繫馬門前柳  
庭空鳥雀散  
門閉客立久  
主人枕書卧  
夢我平生友  
忽聞剥啄聲  
驚散一杯酒  
倒裳起謝客  
夢覺兩愧負  
坐談雜今古  
不答顏愈厚  
問我何處來  
我來無何有

酒盡君可起  
我歌已三終  
由來竹林人  
不數濤與戎  
有酒從孟公  
慎勿從揚雄  
崎嶇頌沙麓  
塵埃汗西風  
昔我

未嘗達今者亦安窮窮達不到處我在阿堵中

說苑孔子遭難陳蔡之境歌兩柱之間子路援干而舞  
三終而出南史顏延之五君詠山濤王戎以貴顯被黜  
再見漢陳遵字孟公屢見漢元后傳后薨王莽詔揚雄  
作誄曰太陰之精沙麓之靈作合於漢配元生成晉顧  
愷之傳傅神寫照

正在阿堵中再見

客去室幽幽服鳥來坐隅引吭伸兩翮太息意不舒吾  
生如寄耳何者為我廬去此復何之少安與汝居夜中  
聞長嘯月露荒榛蕪無問亦無答吉凶兩何如

少年好遠游蕩志隘八荒九夷為藩籬四海環我堂廬

生與若士何足期渺茫稍喜海南州自古無戰場奇峰

望黎母何異崧與邱飛泉寫萬仞舞鶴雙低昂分汎

古文

流字未入海膏澤彌此方芋魁儻可飽無肉亦奚傷

楚辭遠遊悲時俗之迫隘兮願輕舉以遠遊神仙傳若士謂盧敖曰吾方與汗漫期於九垓之外屢見九域志儋州有黎

母山水

馮洗古烈婦翁媼國於茲策勲梁武後開府隋文時三世更險易一心無磷縑錦繖平積亂犀渠破餘疑廟貌空復存碑板漫無辭我欲作銘誌慰此父老思遺民不

可問僂句莫余欺犧牲芻鷄卜我當一訪之銅鼓壺盧

笙歌此迎送詩

北史列女傳譙國夫人洗氏世為南越首領在父母家撫循部衆能壓服諸越海南儋耳歸附者千餘洞梁大同中高涼大守馮寶聘以為妻高州刺史李遷仕反夫人擊之大捷及寶卒嶺表大亂夫人懷集百越數州晏然陳永定二年廣州刺史歐陽紇反夫人發兵拒境詔使持節冊夫人為高源郡太夫人儀如刺史陳亡隋文帝遣陳主遺書諭之歸化夫人得信驗盡日慟哭親披甲乘介馬張錦繖領毅騎衛詔使巡撫諸州封譙國夫人每歲時大會陳所賜物於庭以示子孫曰我事三代主惟用一好心今賜物具存此忠孝之報國語奉文犀之渠注云甲也僂句龜也事出左傳已見史記封禪書令越巫立越祝祠而以鶴卜番禺雜編嶺表之人凡小

事必卜其名鷄卜鼠卜米卜蓍卜牛骨卜鷄卵卜田螺  
卜箇竹卜嶺表錄異銅鼓蠻夷之樂形如腰鼓一頭有  
面頭面圓二尺許用銅鑄其身遍有蟲魚草木之狀擊  
之響亮不下鳴鼉胡盧笙交趾人多取無柄之瓠剖而  
為笙上安十三簧吹之

音律清響雅合律呂

沈香作庭燎甲煎紛相和豈若注微火繁煙嫋清歌貪  
人無飢飽胡椒亦求多朱劉兩狂子公自注朱初平劉  
諡欲冠帶黎人以  
取水隕墜如風花本欲竭澤漁奈此明年何

說苑庭燎大燭也詩有庭燎篇禮記庭燎之百自齊桓  
公始也南史范曄傳撰和香方以比類朝士其序曰沈  
實易和以自比也甲煎淺俗比徐湛之也胡椒暗使元  
載事已見史記孔子世家竭澤涸漁則蛟龍不合陰陽

呂氏春秋晉文公與楚人戰城濮雍季曰竭澤而漁豈不獲得而明年無矣

鷄窠養鶴髮及與唐人游來孫亦垂白頗識李崖州再

逢盧與丁閱世真東流斯人今在亡未遽掩一丘我師

吳季子守節到晚周一見春秋末渺焉不可求

錢希白洞微志太平興國中李守忠奉使南方過海至瓊州界逢一翁自稱楊遐舉年八十一邀守忠詣其家見其父叔皆年一百二十餘又見其祖曰宋鄉年一百九十五語次見梁上鷄窠中有小兒出頭下視宋鄉曰此九代祖也不語不食不知其年朔望取下子孫列拜而已爾雅曾孫之子為玄孫玄孫之子為來孫崖州謂唐相李德裕也德裕大中二年貶崖州司戶參軍洞微志云李守忠見宋卿訪及往時韋執誼李德裕二相經

由宋卿曰李太尉到朱崖雖不多時尚時時令人北去買藥其時某以小吏亦三獻耐料於太尉觀太尉方正端重實為名相雖遷降南荒茅茨之下了無介懷盧丁謂盧多遜丁謂也盧丁皆貶崖州司戶參軍漢楊惲傳古與今如一丘之貉衡按公詩反用其語似謂李與盧丁賢姦之不同也盧丁乃其本朝故語意特深渾左傳襄三十一年吳屈狐庸言於趙文子曰李子守節者也雖有國不立

城南有荒池瑣細誰復採幽姿小芙渠香色獨未改欲為中州信浩蕩絕雲海遙知玉井蓮落葉不相待攀躋及少壯已矣一作失那容悔

黎山有幽子形槁神獨完負薪入城市笑我儒衣冠生

不聞詩書豈知有孔顏翛然獨往來榮辱未易關日暮  
鳥獸散家在孤雲端問答了不通歎息指屢彈似言君  
貴人草莽棲龍鸞遺我古貝布海風今歲寒

莊子大宗師翛然而往翛然而來舊唐書南蠻傳婆利國有古貝草緝花以作布麤者名白蠶番禺雜編嶺南邕容皆有古貝樹語訛為劫貝其花葉似草綠以線碼子績之織為布

戴主簿

海南無冬夏安知歲將窮時時小搖落榮悴俯仰中上天信色荒佳植無由豐鉏耰待肅殺有擇非霜風手裁

蘭與菊侑我清宴終擷芳眼已明飲酒腹尚冲草去土  
自墮井深牆愈隆勿笑一畝園蟻垤齊衡嵩

嶺表錄異廣南節氣四季溫熒常盛暑北風而雨便似  
窮秋或嚴冬南風而晴卻如初夏時之寒暑繫在陰晴

彼人謂  
之溫天

怨詩示龐鈞

當觀有餘樂在戚亦頹然淵明得此理安處故有年嗟  
我與先生所賦良奇偏人間少宜適惟有歸耘田我昔  
墮軒冕毫釐真市塵困來卧重裯憂媿自不眠如今破

茅屋一夕或三遷風雨睡不知黃葉滿枕前寧當出怨  
句慘慘如孤煙但恨不蚤悟猶推淵明賢

柳子厚乞巧文胡為賦授有此奇偏劉  
楨贈徐幹詩起坐失次第一日三四遷

劉紫桑

紅諸與紫芋遠插牆四周且放幽蘭春莫爭霜菊秋窮  
冬出甕盎磊落勝農疇淇上白玉延公自注淇上出能  
山藥一名玉延能復過此不一飽忘故山不思馬少游

與殷晉安別

送昌化軍使張中

張中事見三十  
八卷新居詩注

孤生知永棄末路嗟長勤久安儋耳陋日與雕題親海國此奇士官居我東鄰卯酒無虛日夜慕有達晨小甕多自釀一瓢時見分仍將對牀夢伴我五更春暫聚水上萍忽散風中雲恐無再見日笑談來生因空吟清詩送不救歸裝貧

禮記王制雕題交趾有不火食者矣白樂天答元微之詩與君相遇知何處兩葉浮萍大海中劉禹錫寄僚友詩故人雲雨散

滿目山川多

田舍始春懷古二首

儋人黎子雲兄弟居城東南躬農圃之勞偶與軍  
使張中同訪之居臨大池水木幽茂坐客欲為釀  
錢作屋余亦欣然同之名其屋曰載酒堂用淵明

懷古田舍韻作二首

退居有成言垂老竟未踐何曾淵明歸屢作敬通免休  
間等一味妄想生愧覩公自注淵明本用緬字今聊取其同音聊將自知  
明稍積在家善城東兩黎子室通人自遠呼我釣其池

人魚兩忘返使君亦命駕恨子林塘淺

後漢馮衍字敬通為曲陽令論功當封以讒毀故賞不行帝將召見王護等排間由此得罪顯宗即位又多短衍以文過其實遂廢於家詩小雅有覲面目注覲面懸也詩國風其室則適其人甚遠白樂天渭上釣詩況我垂釣意人

魚又兼忘

茅茨破不補嗟予迺爾貧菜肥人愈瘦竈閒井亦勤我欲致薄少解衣勸坐人臨池作虛堂雨急瓦聲新客來有美載果熟多幽欣丹荔破玉膚黃柑溢芳津借我三畝地結茅為子鄰鵠舌儻可學化為黎母民

韓退之寄盧仝詩時致薄少助祭祀按廣輿記載黎子  
雲兄弟貧而好學所居多林木水竹東坡嘗造訪遇雨  
從農家借笠著屐小兒隨行調笑云云今  
世傳東坡冒雨圖即此事也故附著之

### 停雲

自立冬以來風雨無虛日海道斷絕不得子由書  
迺和淵明停雲詩以寄

停雲在東黯其將雨嗟我懷人道修且阻眷此區區俛  
仰再撫良辰過鳥逝不我佇

莊子其疾俯仰之間再撫四海之外

颶作海渾天水溟漾雲屯九河雪立三江我不出門寤寐北牕念彼海康神馳往從

南越志颶風具四方之風也嘗以五六月興杜子美朝獻太清宮賦九天之雲下垂四海之水皆立再見

凜然清癯落其驕榮餽奠化之廓兮忘情萬里遲子晨  
興宵征遠虎在側以寧先生

遲遠子由二子  
也遠小字虎兒

對奕未終推然斧柯再遊蘭亭默數永和夢幻去來誰少誰多彈指太息浮雲幾何

述興記信安山有石室王質入其室見童子對棋質觀之局未終視所執斧柯已朽爛矣晉王羲之蘭亭叙曰永和九年暮春之初會於蘭亭修禊事也

### 勸農

海南多荒田俗以貿香為業所產秔稌不足於食迺以諸芋雜米作粥糜以取飽予既哀之乃和諏明勸農詩以告其有知者

咨爾漢黎均是一民鄙夷不訓夫宣其真怨忿劫質尋戈相因欺謾莫訴曲自我人

後漢順帝紀益州盜賊劫質令長殺列侯左傳昭公元年日尋干戈以相征討

天禍爾土不麥不稷民無用物怪珍是植播厥熏木腐  
餘是穡貪夫汚吏鷹擊狼食

漢酷吏傳義縱以鷹擊毛摶為治

宣無良田膾膾平陸獸蹤交締鳥喙諧穆驚磨朝射猛  
豨夜逐芋羹諸麋以飽耆宿

毛詩周原膾  
膾董荼如饴

聽我苦言其福永久利爾鉏耜好爾鄰偶斬艾蓬蘽南

東其畝父兄搘杖以扶游手

左傳昭十六年庸次比鶴以父殺此地斬之蓬蒿藜蘆而共處之詩小雅我彊我理南東其畝左傳襄十七年子罕親執朴以扶其不勉者後漢章帝紀元和三年勸農詔曰務盡地力勿令游手

天不假易亦不汝匱春無遺勤秋有厚冀雲舉雨決婦姑畢至我良孝愛袒跣何媿

左傳桓十三年夫人鄧曼曰見莫教而告諸天之不假易也漢書溝洫志鄭國在前白渠起後舉畝為雲決渠為雨

逸諺戲侮博奕頑鄙投之生黎俾勿冠履霜降稻實千

箱一軌大作爾社一醉醇美

尚書無逸乃逸乃諺既誕否則海厥父母生黎見三十八卷用過韻冬至詩注毛詩乃求于斯倉乃求萬斯箱黍稷稻粱農夫之慶

雜詩十一首

斜日照孤隙始知空有塵微風動衆竅誰信我忘身一笑問兒子與汝定何親從我來南海幽絕無四鄰耿耿如缺月獨與長庚晨此道固應爾不當怨尤人

故山不可到飛夢隔五嶺真游有黃庭閉目寓兩景室

空無可照火滅膏自冷披衣起視夜海闊河漢永西牕  
半明月散亂梧楸影良辰不可繫逝水無由騁我苗期  
後枯持此一念靜

黃庭經注脾中央即黃庭  
之宮又黃庭有內景外景

真人有妙觀俗子多妄量區區勸粒食此豈知子房我  
非徒跣相終老懷未央免死縛淮陰狗功指平陽哀哉  
亦可羞世路皆羊腸

史記留侯學辟穀道引輕身呂后德留侯乃強食之漢  
蕭何傳為相國後下廷尉數日赦出何徒跣入謝又上

曰諸君徒能得獸耳功狗也至如蕭何發縱指示功人  
也列侯卑已受封奏位次皆曰平陽侯曹參宜第一上  
善鄧千秋言乃令何第一漢韓信傳高祖令武士縛信  
載後車信曰果若人言狡兔死良狗烹械信至洛陽赦  
以為淮陰侯酈道元水經注羊腸坂在晉陽西北石磴繫委若羊腸故取名焉

相如偶一官嗤鄙蜀父老不記犢鼻時滌器混庸保著書  
曾幾何渴肺灰土燥琴臺有遺魄笑我歸不蚤作書  
遺故人皎皎我懷抱餘生幸無媿可與君平道

九域志成都府古跡有司馬相如琴臺漢書王吉貢禹  
傳序蜀有嚴君平卜筮於成都市以為卜筮者惑業而  
可以惠衆人有邪惡非正之間則依蓍龜而言利害

孟德黠老狐姦言嗾鴻豫哀哉喪亂世梟鸞各騰翥逝  
者知幾人文舉獨不去天方斬漢室豈計一郗慮昆蟲  
正相齧迺比蘭相如去聲我知公所坐大名難久住細德  
方險微豈有容公處既往不可悔庶為來者懼

後漢孔融傳字文舉曹操忌融正議慮鯁大業山陽郗  
慮承望風旨奏免融官因顯明讎怨操故書激厲融曰  
廣蘭小國之臣猶能相下國家東遷文舉盛歎鴻豫名  
實相副鴻豫亦稱文舉奇逸博聞誠怪今者與始相違  
操既積嫌忌郗慮復構成其罪遂令路粹枉狀奏融下  
獄棄市郗慮字鴻豫史記越世家范蠡曰大名之下難以

久居賈誼弔屈原賦見細德  
之險微兮遙增擊而去之

博大古真人老聃關尹喜獨立萬物表長生乃餘事稚  
川差可近儻有接物意我頃登羅浮物色恐相值徘徊  
朱明洞沙水自清駛滿把昌蒲根歎息復棄置

莊子天下篇闡尹老聃古之博大真人哉

朱明洞詳三十五卷遊羅浮山公自注

藍喬近得道常苦世褊迫西游王屋山不踐長安陌爾  
來寧復見鳥道度太白昔與吳遠遊同藏一瓢窄潮陽  
隔雲海歲晚儻見客伐薪供養火看作栖鳳宅

英州鄭總作藍喬傳喬字子升循州龍川人母陳氏禱  
羅浮山而孕年十二已能為詩文求道書讀之辭母之

江淮抵京師七年而歸語母曰兒所以復返者念母故  
也瓢中出丹一粒餽焉以黃金數斤遺母曰是真氣所  
成潮州人吳子野過之於京師方大暑同登汗橋買瓜  
喬曰塵埃汙吾瓜當於水中散爾自擲於河至夜不出  
吳候其却則已酣寢始知喬已得道遂與執爨語人曰  
吾羅浮仙人也由此升天矣一日躡風雲而上征宮中  
厯厯聞笙簫聲猶長吟李太白詩云下窺夫子不  
可及矯首相思空斷腸吳子野嘗謁東坡於惠州

南榮晚聞道未肯化庚桑陶穎鑄強犷枉費塵與糠  
越子古成之韓生教休糧參同得靈鑰九鑠啟伯陽鶩城  
見諸孫貧苦我為傷空餘焦先室不傳元化方遺像似

# 李白一奠臨江觴

神仙傳魏伯陽得神丹玄奧之理微顯闡幽著參同契  
三卷隱丹經金匱九籥有九轉丹法籥所以藏書也後  
漢華陀傳字元化精於方藥為曹操所殺臨死出一卷書與獄吏曰此可以活人吏畏法不敢受佗索火燒之

餘齡難把玩妙解寄筆端常恐挹永歟不及丘明遷親友復勸我放心餞華顛虛名非我有至味知誰餐思我無所思安能觀諸緣已矣復何嘆舊說易兩篇

申韓本自聖陋古不復稽巨君縱獨慾借經作巖崖遂令青衿子珠璧人人懷鑿齒井蛙耳信謂天可彌大道久分裂破碎日愈離我如終不言誰悟角與羈吾琴豈

得已昭氏有成虧

史記申韓傳申不害荆人也申子之學本於黃老而主刑名韓非韓之諸公子也喜刑名法術之學而其歸本於黃老漢王莽傳字巨君奏起明堂辟雍靈臺為學者築舍萬區益博士員徵天下通一藝教授十一人以上及有逆禮古書毛詩周官爾雅通知其意者詣公車晉習鑿齒傳釋道安與鑿齒初相見道安曰彌天釋道安鑿齒曰四海習鑿齒再見漢夏侯勝傳章句小儒破碎大道昭氏成虧出莊子齊物論已見三十八卷餅笙詩我昔登朐山出日觀滄涼欲濟東海縣恨無石橋梁今茲黎母國何異于公鄉蠻浦既黏山暑退亦飛霜所欣非自調不怨道里長

九域志海州東海郡朐山縣滄涼字出列子已見三十  
五卷浴日亭詩注番禺雜編蠻殼即牡礪有高四五尺  
者水底見之如山岸呼為蠻山韓退之初南食詩  
蠻相黏為山南史張融海賦積雪中春飛霜暑路

### 連雨獨飲

吾謫海南盡賣酒器以供衣食獨有一荷葉杯工  
製美妙留以自娛迺和淵明連雨獨飲二首

平生我與我舉意輒自然豈止磁石鐵雖合猶有間此  
外一子由出處同偏僊晚景最可惜分飛海南天糾纏  
不吾欺寧此憂患先顧引一作影一杯酒誰謂無往還寄

語海北人今日為何年醉裏有獨覺夢中無雜言

晉殷浩傳桓溫嘗問浩君何如我浩曰我與我周旋久寧作我漢賈誼服賦禍之與福何異糾纏應劭曰如糾索相附會也臣瓊曰糾絞也繆索也

晉劉伶傳

仍引酒御肉隗然復醉

阿堵不解醉誰歟此頹然誤入無功鄉掉臂嵇阮間飲  
中八仙人與我俱得儂淵明豈知道醉語忽談天偶見  
此物真遂超天地先醉醒可還酒此覺無所還清風洗  
徂暑連雨催豐年牀頭伯雅君此子可與言

陶淵明獨飲詩故老贈予酒乃言飲得仙試酌百情遠  
重觴忘天天際去此幾任真無所先無還借用楞嚴

經語再見魏文帝典論劉表子好酒為三爵大曰  
伯雅受七升次曰仲雅受五升次曰季雅受三升

王撫軍座送客

再送張中

胷中有佳處海瘴不能腓三年無所媿十口今同歸汝  
去莫相憐我生本無依相從大塊中幾合幾分違莫作  
往來相而生愛見悲悠悠含山日炯炯留清輝懸知冬  
夜長不恨晨光遲夢中與汝別作詩記忘遺

毛詩百卉具腓莊子大塊載我  
以生維摩經不使人有往来想

答龐參軍

三送張中

留燈坐達曉要與影晤言下帷對古人何暇復窺園使君本學武少誦十三篇頗能口擊賊戈戟亦森然才智誰不如功名歎無緣獨來向我說憤懣當奚宣一見勝百聞往廬臯蘭山白衣挾三矢趁此征遼年

詩國風彼美淑姬可與晤言漢董仲舒傳下帷講論蓋三年不窺園史記孫武傳以兵法見閩閭閩閭曰子之十三篇吾盡觀之矣可以小試勒兵乎晉朱伺傳楊珉曰朱將軍何以不言伺曰諸君以舌擊賊伺惟以刀耳

唐高祖諸子傳號王巨入對合旨楊國忠謂巨曰比來人多以口打賊君不爾乎漢趙充國傳百聞不如一見兵難隃度願馳至金城固上方畧漢霍去病傳合短兵  
平臯蘭下唐薛仁貴傳天子征遼仁貴著白衣自標顯所向披靡後與九姓衆戰發三矢輒殺三人互見三十三卷次韻王晉卿詩注

### 桃花源 幷引

世傳桃花源事多過其實考淵明所記止言先世避秦亂來此則漁人所見似是其子孫非秦人不死者也又云殺鷄作食豈有仙而殺者乎舊說南陽有菊水水甘而芳居民三十餘家飲其水皆壽或

至百二三十歲蜀青城山老人村有見五世孫者  
道極險遠生不識鹽醯而溪中多枸杞根如龍蛇  
飲其水故壽近歲道稍通漸能致五味而壽益衰  
桃源蓋此比也歟使武陵太守得而至焉則已化  
為爭奪之場久矣常意天壤間若此者甚衆不獨  
桃源予在潁州夢至一官府人物與俗間無異而  
山川清遠有足樂者顧視堂上榜曰仇池覺而念  
之仇池武都氏故地楊難當所保予何為居之明

日以問客客有趙令畤德麟者曰公何問此此乃  
福地小有洞天之附庸也杜子美蓋云萬古仇池  
穴潛通小有天他日工部侍郎王欽臣仲至謂予  
曰吾嘗奉使過仇池有九十九泉萬山環之可以  
避世如桃源也


凡聖無異居清濁共此世心閒偶自見念起忽已逝欲  
知真一處要使六用廢桃源信不遠杖藜可小憩躬耘  
任地力絕學抱天藝臂雞有時鳴尻駕無可稅苓龜亦

晨吸杞狗或夜吠耘樵得甘芳  
乾齧謝炮製子驥雖形隔  
淵明已心詣高山不難越  
淺水何足厲不如我仇池高  
舉復幾歲從來一生死近又  
算癡慧蒲澗安期境羅浮  
稚川界夢往從之游神交發  
吾敝桃花滿庭下流水在戶外  
卻笑逃秦人有畏非真契

傳燈錄爲山云凡聖同居龍蛇混雜楞嚴經當知是根  
非一非六汝須陀洹雖得六銷猶未忘一又塵既不緣  
根無所偶反流全一六用不行莊子大宗師化予之左  
臂以為難予以求時夜化予之尻以為輪以神為馬  
予因而乘之豈更駕哉羅浮山靈異記麻姑壇有枸杞  
樹時有赤犬見於樹下或天晴朗時聞犬吠聲陶淵明

桃源記 南陽劉子驥高尚士也聞之欣然親往遊焉嶺表錄異菖蒲澗在廣州城之東北十五里澗中生菖蒲多是一寸十二節山半有菖蒲觀跨水有玉鳥閣即安期生上昇之地互見三十五卷廣州蒲澗寺注羅浮山記葛稚川入羅浮煉丹弟子從之者五百餘人置觀四所今丹存焉

施註蘇詩卷四十二



總校官庶吉士臣張能照

校對官編修臣楊壽楠

謄錄監生臣邵士洙

謄錄監生臣趙由青